

## MAKINU OWAOWA

*Dioni babadaido minu ma iwoka ukeka wake*

<sup>1</sup> Yesu Keriso Godinu amara Danu irau wake ewado na Maki nama awoena owaowa uke odakune.

<sup>2-3</sup> I mi Isaiya Godinu we bou ukeka mi danu bukaro Godinu wake demuiro owaowa uke odike efene ibake weike Godima Dawabairo mai wake eno wei,

eawe, nanu fo weeka mi dawako we odaimauro anifekuke Dai Minu daaba wabuke ma giena ufeku enaenari yanu imuka imuke ma giena ukeibiawe eno wei. I fo weeka mima yao nauwaro enarada iroma weibi, Dai Minu daaba wabuke ma gienabu uawe weia,

Isaiyama eno yewa wake owaowa yanake odi.

<sup>4</sup> Ibake Dioni babadaido ukeka mima eme ibe me yao nauwaro fariro eme keuwere dawabairo fakaro dawama eno wei, yanu merama ukeka sineka imuke mediawero Godima yanu merama ukeka sineka mufike imuke medifiro ya yaisina babadaido umia wei.

<sup>5</sup> Eno weiro Derusaremu goi orouini i Diudia orofaro moi goi goi orouini emua yaisina Dionibairo aare fakake emenu merama ukeka sineka we ma boroo yakaro Dionima i orou i Diodeni aduaro babadaido urie.

<sup>6</sup> Dioni danu barukekae irau me meramawere kemo abunu ofema barukeibi. Nono danu gabaganee boromakaunu ofema wayareibi. Nono danu iseka urunae sigigini ewereini eno iseibi.

**7** Dionima ibaada eno weibi, nanu dubuenaro moi mi nanu umuro aafeku. Dawa buna daiwere na ari meya eno weibi. Na irauaiai meba Danu ibooro deri da umau wei.

**8** Awoena ba aduama babadaido uniaba nono dubuenaroe Dawa Godinu Imumu Irauma babadaido ufiakua eno wei.

*Yesu babadaido ui odoini seidanimu uke iruke ereibi odobake wei wake*

**9** Moi furo Yesu Nasaredi Gareri goiroma aare Dionibairo fari. Fariro Dionima Diodeni aduaro Yesu babadaido ui.

**10-11** Eno uiro Yesu aduaroma duero ido amukada eribaie urero ure eba uiro Godinu Imumu Irau ubari ada ari Dawabairo isare aari. Isare aariro ureroma wake daiwere weike eno wei, A Nanu amara ubibake Nanu imuka yaisina Abairo ibinu ibake Na rooro daiwere ukakunea Godima i wake eno wei.

**12** Eno weiro Godinu Imumu Irauma Yesu munike eme ibe me orofaro waure ane odiro ibi.

**13** Dawa iro ibaada eweka keuwere fodi (40) iro ibeibiro seidanimu Yesu uke iruke efine ibake Dawabairo fari. I awe abuini adaini ibeibisa orofaro Yesuini ibeibiro Godinu aneruma isare aare Yesu yawokeibisa.

*Yesuma adua abu muneka orou unayaini unayaini we murie wake*

**14-15** Dioni ana ebaro waure ane oisaro dubuena Yesu Gareri orofaro ane farike Godinu irau wake weada wefine eno wei, Godi Danu yawokaku eweka ido farinuba yanu merama ukeka sineka imukena mediaweke Godinu irau wake nauaweke mune awararo odiawe eno wei.

**16-17** I Gareri kuna udiro enerebe eribaie Saimonini danu nabue Enuduruini emuama aduaro

iwame ode ere enereibisiro erie. I miyai emua adua abu muneka miyai. Yesuma emuabake eno wei, Na aare we wauakoakiro anifeke yaeeme muneka miyai odimiaro eme muawaro Godinu irau wake naukeka orou sifisa wei.

<sup>18</sup> Eno weiro emenu iwame idua meisike aare Yesubairo fakiro kowede anisa.

<sup>19</sup> Yesuma yafa menaku eka faraada erib-  
iae Debedinu amarayai Deimisini Dionini emua  
you ubarenaro emenu iwame ma wiromeibisiro  
emua erieke eno wei, Nabairo aarawa wei.

<sup>20</sup> Yesuma eno weiro sabu emenu babaeini  
waiya ukeka orouini boudi ubarenaro  
mediriekike Yesunu umuro anisike ane  
Dawabairo fakiro kowede anisa.

### *Seidaninu imumu merama bobo minu wake*

<sup>21</sup> Aneebe ane Kafenamu goiro faka. Fakaro Sabadi odo fariro Du orounu sosi uwara ubarenaro amuike we ma iwoka ukeibirie. Eno ukeibiriero Danu we ma iwoka ukeibirie ibake ima emenu imuka foria uisa.

<sup>22</sup> Dawama we ma iwoka ukaada eno uawe  
weibi ibake Danu we ma iwoka ukeka ie bunaw-  
erero nono i Mosesinu darawadu sisa orouma  
we ma iwoka ukaada moi mima enaenari uawe  
weakua eno ukeibiaweweibisabake emenu we  
ma iwoka ukekae buna me ibake i orouma  
Yesunu bunawere we ma iwoka ukekabake foria  
daiwere uisa.

<sup>23-24</sup> I seidaninu imumu merama bobo mima  
sosi uwara ubarenaro ido amuike u weike eno  
wei, Yesu Nasaredi goi mi, aini naini demui  
meba aneme da uke makafukua eno wei. Eno  
weike nono wei, anemebake aarinu wei? Iya  
ma merama ufane ibake aarinu wei? Eno weike

nono wei, Ae na iwoka, Ae i Godinu irauaiai miya wei.

<sup>25</sup> Enō weiro Yesuma dino ukaada ma owerike eno wei, wake da weake dawabairoma amuake ania wei.

<sup>26</sup> Enō wei ibake i seidaninu imumu meramama i mi ma biruru biruru ukaada arua daiwere weada imuka ubarenaroma fare isare ani.

<sup>27</sup> I ukeibi ubu ekake i orou emenu imuka foria daiwere ukaada emenu imusu we makanada yewa anemedei ubu weisa? Awoena we ma iwoka ukekae buna daiweref. Emebairo wenuroma nono I seidaninu imumu meramaini wenuro naukisake fare isare anisaya eno weisa.

<sup>28</sup> Yesunu we ma iwoka ukeibirie ibai Gareri ororofa eneiareibisa.

### *Yesuma eme keuwere ma wirokeibirie wake*

<sup>29</sup> I Du orounu sosi uwara meisake Saimonini Enuduruini emenu uwara ubarenaro i miyaini Yesuini Deimisini Dionini emua yaisina ido amuisa.

<sup>30</sup> Amuisake ekabaie Saimoninu daroeya arama uike ofe wadada daiweref uiro aine ibi.

<sup>31</sup> Aine ibiro Yesubairo fare weisa ibake aare Saimoninu daroeyanu wanaro munike ma uyariro danu wadada ukeibi ibai idua ure nuda uriro wirokeike ani. Anike emua uruna waure aare mariero isa.

<sup>32</sup> Dumudumu sinike eweka ane isareibiro i seidaninu imumu merama bobo orouini arama urie orouini emua yaisina Yesubairo waure aare farieka.

<sup>33</sup> I goi orou keuwere i Saimoninu uwara aisamero ku ukeibisa.

<sup>34</sup> Ku ukebisaro arama imusu imusu uisa orou keuwere ma wirokeibirieke seidaninu imumu

merama keuwere we ma berai. We ma berairo seidandinu imumu merama Yesu Dawa Godinu Amaraya ibai emua iwoka sikaba ibake emenu wake weeka daaba enare kuuri ibake emua wake we dauisake me anisa.

*Yesu Gareri orofaro wake wei*

<sup>35</sup> Wai awa dumu obaro Yesu uyarike eme ibe me orofaro anike Godibairo guriguri ukeibi.

<sup>36</sup> Eno ukeibiro Saimonini danu naiyemukuni emuama Yesu ani biaro yowere anisake ekake eno weisa, eme yaisina a yodia ukaisaya eno weisa.

<sup>37-38</sup> Eno weisaro Yesuma emuabake ma owe-rike eno wei, moi goi goiro animake Godinu wake wemane ibake fanea eno wei.

<sup>39</sup> Eno weiro Gareri nauwa goi goi yaisinaro anike Du orounu sosi uwara keuwerero wake weibike seidandinu merama imumu keuwere we ma berakeibi.

*Beko mami mi Yesuma ma wiroi wake*

<sup>40</sup> Moi beko mami mima Yesubairo farike Yesunu ibooro ifoma kodudu yanakada eenu weada eno wei, anu arara ufakuie na ma wiroaro wiroma wei.

<sup>41</sup> Eno weiro Yesuma ia sine dauike imukari daiwera uike i mi ure burisada eno wei, Nanu ararae a ma wiromauane wei.

<sup>42</sup> Eno weike wei, beko me siaro wiropi weiro ido beko me siniro wiroi.

<sup>43-44</sup> Wiropi Yesuma i beko bou irau sini mi ido odaisada bunawereroma eno wei, eme moibairo da ane wayai weake i Godibairo ofereni ode sibore sianeka mibairo aniake ma iwoka uaro efi wei. Mosesinu darawaduma eno weaku, i beko boubake we sibore sianeka enaenari ua wei. Anu

ofe irauaiai ukinua aniake ma iwoka uaro efi wei.  
Ibake anu ofe irauaiai ukinuba i orou efeisake  
iwoka ufeisaya wei.

<sup>45</sup> Enō weiro nauke medike goi keuwere iro  
aniake eme yaisinabairo ane Yesunu ui i yaisina  
wei ibake eme keuwere i Yesu ibi goiro faka. Faka  
ibake Yesuma goiro fare dauike kebiro yaureibiro  
i goi orou yaisina Yesubairo faka.

## 2

### *Yesuma i umu wana daba mami mi ma wiroi wake*

<sup>1</sup> Odo keu mero Yesuma nono owerike Kafe-  
namu goiro fari.

<sup>2</sup> Fariro i orou yaisina Dawa fari ibai nauisake  
ane Danu uwara ubarenaro ku uisake uwaraini  
aisameini enare yaare ibisa.

<sup>3</sup> Ibisaro Yesuma Godinu wake weibiro moi  
miyaini moi miyaini eno faka. Umu wana daba  
mami mi boiso dubo uisake waukake Yesubairo  
anifisane faka.

<sup>4</sup> Iro fakake emenu ararae uwara ubare-  
naro waure amufisane uisabaie eme keuwere  
dadau uisa ibake Yesubairo waure anifisa daaba  
mebake ferawere uwara fouro waure amuisake  
i ferawere uwara fou ma dorobu yakake i umu  
wana daba mami mi naama danu boiso duboini  
uwakake ebaro odaisaro Yesubairo isari.

<sup>5</sup> Iro isariro Yesuma emenu imuka yaisina  
Dawabairo oisa ibai Dawa iwoka sinaada i  
umu wana daba mami mibake eno wei, Nanu  
amara, anu merama ukekka sineka muneke imuke  
medinea eno wei.

<sup>6</sup> Yesuma wei ibaibake moi Mosesinu darawadu  
sisa orou emenu awarama imuisake eno weisa,  
anemebake wake eno weaku weisa?

<sup>7</sup> Eno weakuie Godini Dawaini emua demuiya weada weakua weisa. Weisake i ari enoe Godi mane merama ukeka sineka mune imuke medaku weisa.

<sup>8</sup> Eno weisa ibake Yesu Dawa emenu imukeka iwoka sinaada ibake uyarike emuabairo eno wei, i ari eno wake anemebakemba imukama imuke weaisa wei?

<sup>9</sup> Abó wakema ofe arama mi aneaneme wemau, anu merama ukeka sineka mumauke imuke medimauba, ba anu wea muake ania wemau wei? Abodei wakema arawere wei. Eno weike nono wei, uyake anu wea muake ania wei. Idei wakema arawere wei, nono anu merama ukaku ima imuke medimau wene wakeye ara me wei.

<sup>10</sup> Eno weike nono wei, Na i Ba Eme sine Mi, Nanu moi buna ukeka umaro ya eaweke iwoka siawe weike nono wei, i mane meroma yanu dooro merama ukeka sineka munakuneke imuke medakunero ya eraada iwoka sinaisaya wei.

<sup>11</sup> Eno weike i umu wana daba mami mibake nono wei, uyake anu wea muake goiro ania wei.

<sup>12</sup> Eno wei ibake uyarike danu wea munike aniro eme keuwere ibai eraada imuka foria daiwerekere uisake eno weisa, iya adinaro eno ere mebairo awoena kawama eraisia eno weisa. Eno weisake ibake Godinu buna ukekabake Danu ibi we ma daiwerekere ukeibisa.

### *Yesuma Riwai u we muni wake*

<sup>13</sup> Yesu nono owerike Gareri kuna udiro fari. Fariro eme yaisina ane ku uisaro Yesuma emua we ma iwoka ukeibirie.

<sup>14</sup> Dubuenaro nono Yesu enerebe eribaie Arofiesinu amara Riwai danu dakesi muneka orofaro yaure ibiro erike eno wei, aarake Nanu

iwoka ukeka mi sia wei. Eno wei ibake i mima uyarike Yesunu umuro ani.

<sup>15</sup> Yesuini Danu iwoka ukeka orouini emua Riwainu uwara ubarenaro yaure ibaada uruna iseibisa. Isebisaro dakesi muneka orouini merama ukeka sineka orouini keuwere Danu umuro enarada ekabaie moi orouini Yesuini emua yaukake uruna iseibisa ibai eka.

<sup>16</sup> Ibai ekake Mosesinu darawadu wake we ma iwoka ukeibisa orouini Ferosi orouini emuama Yesuini dakesi muneka orouini merama merama ukeka orouini uruna iseibisaro ekake Danu iwoka ukeka oroubairo eno weisa, Yesuini dakesi muneka orouini nono i moi merama ukeka sineka orouini Yesu anemebake emuaini uruna demuiro isaku weisa?

<sup>17</sup> Eno weisaro Yesu emenu weisa wake nauike eno wei, i ofe arama me oroubake arama ma wirokeka mi aare dakinuke i ofe arama uke ibinisa oroubake aarinua eno wei. Eno weike nono wei, iya irau oroua weisa oroubake wemane wayo aare dauneke Nae i merama ukeka sineka oroubake wemane wayo fanea Yesuma eno wei.

### *Uruna kau ukekabake we nauke ereka wake*

<sup>18</sup> Dioni danu iwoka ukeka orouini Ferosi orouini emenu bisarae eno, uruna ise dakeibisake kau uisabake uruna ise me. Enoba moi orouma Yesubairo eno weisa, Dioninu iwoka ukeka orouini Ferosi orouini emua uruna ise me. Nono Anu iwoka ukeka oroude anemebake uruna isaisa weisa?

<sup>19</sup> Emuama eno weisaro Yesuma emuabake eno wei, aweka awoena mufeku mi danu banau ufiro i mi dawae danu oroubairo ibinuba ibake danu naiyemuku dawabairo aare ifeisaya wei.

**20** Moi odo i aweka awoena mufeku mi moiro anifekuiie i uruna da ifeisake kau ufeisa. Enae-nari Na animauie Nanu iwoka ukeka orou imukari ufeisake eno uke uruna kau ufeisaya eno wei. Eno weike wei, nono awoena Naini ibinisiiie iseifeisaya eno wei.

**21-22** Yesuma nono wei, ainama awoena wau fekama adina wau sia ebaro fifini ufekuiie i adina wau ido babafekuke eba daiwere ufekua weike nono wei, ainama i awoena wainima i adina abu ofero iifikuro awoena wainima adina abu ofe babanao ufekuke isanaao ufeku ibake i awoena wainima ure wawarada i adina abu ofe ma merama ufeku ibake weike nono wei, i awoena wainima i awoena abu ofero iifikuiie irauaiaiaya wei. Yesuma i Mosesinu adina darawadu wakeini nono Danu awoena wakeini ma demuiro da ufoisaya weada ibake i wakeroma eno dubo waure wei.

### *I sabadi odonu ubi we nauke ereka wake*

**23** Moi Sabadi ewekaro Yesu Danu iwoka ukeka i orouini konoura waiya ubarenaro fare fisii yare anaada Danu iwoka ukeka orouma konoura ma roine isaada eneibisa.

**24** Eno ukeibisaro i Ferosi orouma ekake Yesub-airo eno weisa, ya i Sabadi ewekaro eno anemebake ukaisa weisa? Iyanu darawaduma weakubai i Sabadi ewekaro waiya da uwae weakua eno weisa.

**25-26** Eno weisaro Yesuma emuabake ma owe-rike eno wei, Deiwidini danu orouini desini ureibibake uruna mune iseibisa i wake ya kakuraisakema nono ma nuna ukaisaya wei. Eno weike nono wei, Abiada dawa Godinu dai ofereni ode sibore sianeka mi i dai sosi yawokeibiro Deiwidima Godinu dai sosi uwara ubarenaro amuiro

Abiadama i dai sosi uwara yawokeka orounu Godi ereibi iifa buredi mairo munike isaada danu oroubairo mariero isaya eno wei. Emuae eno uisaroma nono Godinu darawaduma emua unu koreka daaba dadau uke dakakua wei.

<sup>27-28</sup> Eno weike nono wei, Godima emeko ubu uike nono dubuenaro Sabadi eweka ai ubu uiba ibake i Ba Eme Sini Mi Dawae i Sabadi odonu ubi mi. Dawama i Sabadi eweka idua yawokeibakua eno wei.

### 3

#### *Wana merama bobo minu wake*

<sup>1</sup> Yesu nono i Du orounu sosi uwara ubarenaro amuike eribaie wana merama mi idua yaure ibiro eri.

<sup>2</sup> Eriro i orouma Yesu ekake imukenbe eno weisa, Yesu i wana merama mi yewa Sabadi odoro ma wiropfekuba me ari weisa? Eno weisa ibake eraada emenu emenu we nauisake Yesu kodoro odifisane weisa.

<sup>3</sup> Yesuma i wana merama mibake eno wei, uyake i orounu ubarenaro enaa wei.

<sup>4-5</sup> Yesuma eno weike i orou yaisinabairo nono wei, Abodeima irauaiai wei, Sabadi odoro eme unu komiauba ma merama umiau wei? Ma wiromiauba ma feamau wei? Eno weibaie i orouma moko we dauisa ibake Yesu dino ui. Dino ukaada i orou yaisina ure owere ma owere uke erieke emenu aya muneka iwoka uike i wana merama mibake eno wei, anu wana siaa weiba ibake danu wana sianiro gienabu uike irau sini.

<sup>6</sup> I Ferosi orouini Du orounu sosi uwara ubarenaroma aweawero amuke fakake Erodi weaisa orou fou uriekake we makanada Yesu ma feareka daaba yodia ukeibisa.

*I Gareri kuna udiro fare ibisa orounu wake*

<sup>7</sup> Yesuini Danu iwoka ukeka orouini i Gareri kuna udiro anisaro nono i Gareri orouini Diudia orouini Yesunu umuro anisake Yesunu we ma iwoka ukeibi wake yaisina nauisake Danu umuro anisa.

<sup>8-9</sup> Eme keuwere Yesunu umuro anisa. I Gareri orofa orouini Diudia orofa orouini Derusaremu goi orouini Idumeia orofa orouini Diodeni adua ekarana orouini Daira goi orouini Saidoni goi orouini eme keuwere Yesunu ukeibi ibai nauisake aareibisa ibake Yesuma Danu iwoka ukeka oroubake eno wei, na you mune bou ukeibiawe wei. I eme feferama ode dakaa unao ufeisa ibake eno wei.

<sup>10</sup> Adinaro arama ukeibisa orouini ma wirokeibirieba ibake eme keuwere awoena arama ukeibisa orouini emenu ararae Yesunu ofe ure burifisake irau sifisane ibake Dawabairo faka.

<sup>11</sup> Seidaninu merama imumu moi orounu imuka ubarenaro rewoke ibisaro faka. Fakaba seidaninu merama imumu bobo orouma Yesu ekake dooro isare biruke isarada eno weisa, A Dawa Godinu Amaraya eno weisa.

<sup>12</sup> Eno weisaro Yesuma wei, Nae Godinu amaraba yewa wake moi oroubairo da ane weforo wei.

*Yesu Danu iwoka ukeka orou yaisina duwero  
(12) we murie wake*

<sup>13</sup> Yesu oraararo amuke anike Danu arara ukeibi orou u weiro Yesubairo aare faka.

<sup>14-15</sup> Yesuma eme yaisina duwero (12) Dawaini ibekabake we munike Danu wake wefiro wefisane ibake emua murieke seidaninu merama

imumu we ma berakeifisane ibake buna daiwere marie.

<sup>16</sup> I orou emenu ibi ibiye yewado, Saimoninu awoena ibi Fida mami.

<sup>17</sup> Debedinu amarayai Deimisini danu dabue Dionini emenu awoena ibiye Boanari mami. I ibinu ubiye ure ure weaku ari eno adarabai mamirie.

<sup>18-19</sup> Enuduruini Firifuini Badoromiaini Madiuni Domasini Deimisini dawae Arofiesinu amara, dawaini Dediussini dawa Keinani orofa mi, moi Saimonini Diudiasi Ikariada, i mi Diudiasi dawae Yesu weforairo muka mi. I orou yaisinabake Yesuma u weiro Dawabairo ane faka.

### *Yesuini Biesabonu wake*

<sup>20</sup> Yesuini Danu iwoka ukeka orouini uwara ubarenaro amuisa. Amuisaro eme keuwere ku uisa ibake Yesuini Danu iwoka ukeka orouini emua i uruna ise da uisa.

<sup>21</sup> Eno uisaro eme moima eno weisa, Yesu gogore ukinu weisa ibake Yesunu goi orouma nauisake Yesu we mufisane faka.

<sup>22</sup> Moi Mosesinu darawadu wake we ma iwoka ukeibisa orouma Derusaremu goiroma fakake eno weisa, Danu imukaro Biesabo ibinu ibake emenu bokai merama imumunu bunaroma seidanimu merama imumu we berakakua eno weisa.

<sup>23</sup> Eno weisabaie Yesuma ewaro aarawe weiro ane faka. Fakaro dubo waure weike eno wei, seidanimu danu merama imumu da mune siafeku wei.

<sup>24</sup> Eno weike Yesuma nono eno wei, gaemani orou emenu imusu urafeisaie emenu buna ido isafekua wei.

<sup>25</sup> Nono uwara demui orou emenu emenu uranada abanaro ma gaganceroma imusu

imusu enafeisake urafeisaie emenu ibekae idua  
merama sifekua wei.

<sup>26</sup> I ari enoe seidani danu moi orou we yowe-  
fiakuie danu onami we yowenao ufekua wei.  
Eno ufekuiie danu imusu abanaro ma gagafekuro  
danu yawokeka buna ido merama sifekua wei.

<sup>27</sup> I moi waira ukeka mima bunama imusu ari  
minu uwara ubarenaro amufike bunama imusu  
ari minu wana uwane karifekuke danu eraer-  
abusa waira ufekuke anifekua Yesuma eno wei.

<sup>28</sup> Yesuma eno weike nono wei, i ari enoba  
yabake ba wake weakunea nauawe wei, emenu  
merama ukekaini sara merama weekaini i  
yaisina Godima mufekuke imuke medifekua  
wei.

<sup>29</sup> Nono ainama Godinu Imumu Irau sara we  
ma merama ufekuiie Godima i merama ukeka da  
mune imuke medifekuro danu merama ukeka i  
mibairo ibene ibene ibeifekua eno wei.

<sup>30</sup> I owaowa odeka orouma adinaro eno  
weisa, Yesu Dawa seidaninu imumu merama  
Dawabairo ibinu ibake seidaninu merama  
imumu we berakakua weisaroma nono Yesu  
Dawae Godinu Imumu Iraunu bunaroma we  
berakeibi ibake Yesuma emuabake dubo waure  
weada i ari eno wei.

### *Yesunu amaeini Danu naburakaini emenu wake*

<sup>31-32</sup> Yesu Danu amaeini Danu naburakaini  
aakake aweawero enakake Yesu efene aarisia  
weisaro eme keuwere Yesuini demuiro yaure  
ibisaro moi orouma Yesubairo fakake eno weisa,  
Anu amaeini naburakaini aruarumaini uwara  
udiro enare ibaada A we nauke eraisaya weisa.

<sup>33</sup> Eno weisabaie Yesuma eno wei, Nanu  
ameini naburakabake weaisa wei? Nanu wake

wemaro nauawe wei, Nanu amaeini naburakade  
abo orouro wei?

<sup>34</sup> I ku uke ibisa orou eraada emuabake eno  
wei, yewa oroue Nanu amaeini naburakaini  
yewadoya wei.

<sup>35</sup> Abo orouma Godinu wake naukenewaa ufei-  
saie emuae Nanu amaeini nabueini Nanu aruaru-  
maya eno wei.

## 4

### *I yo sianeka minu dubo waure wei wake*

<sup>1</sup> Moi odoro Gareri kuna udiro Yesuma we ma  
iwoka ukeibiriero eme keuwere enare kara uisa.  
Enare kara uisa ibake youro amuike yaure ibiro  
i orou kuna udiro enare ibisa.

<sup>2-3</sup> Yesuma wake keuwere dubo waure wefine  
weike eno wei, nauawe, moi mima waiyaro  
yobai waifine anike diru munike yobai munike  
sianeibi.

<sup>4</sup> Sianeibiro moi yobai daabaro isakaro adama  
fakake i yobai ise me sika.

<sup>5</sup> Moi yobai oma duboro isakake sabu warake  
amuisa.

<sup>6</sup> Warake amuisake doo aweawewere ibake  
ewekama farike yanairo iini funanaku ibake  
boke ure me sika.

<sup>7</sup> Nono moi yobai sinisini bobo i ou ubare-  
naro isakake warakakema nono orobuwereba  
onu eriro kaibai uwane da uisa.

<sup>8</sup> Moi yobai irau dooro isakake warakenewaa  
uisake kaibai keuwere uwaka. Moibai keuke-  
unaku uwaka, kai demuima kaibai dedi (30)  
uwaka. Nono moibai keukeuwere uwaka, kai  
demuima kaibai sikisidi (60) uwaka. Nono

moibai keuwere uwaka, kai demuima kaibai wani aderedi (100) uwakaya wei.

<sup>9</sup> Yesuma weike eno wei, ya ome bobo orouronae Nanu wake naukenewaa uawe wei.

*I dabo waure wei wakenu ubi*

<sup>10-11</sup> Dubuenaro i ku uke ibisa orou anisaro moi ibisa orouini Danu iwoka ukeka orou duweroini (12) emuama i dabo waure wei wakenu ubi yodia uisake weisa ibake Yesuma eno wei, Godima Danu ure yawokaku fe wakenu ubi ma boro yarakuro ya iwoka ukaisaya wei. Godinu wake mune dakaisa oroue dabo waure weaisa wake mane naukaisake dabo waure weaisa wakenu ubi ma nuna ukaisaya wei.

<sup>12</sup> Eno weike wei, ibake ereka eraisakema nono ba bai ere dakaisaya wei. Naukeka naukaisakema nono i wakenu ubi ma nuna ukaisaya wei. I wakenu ubi iwoka sinao ufeisake emenu imuka yaisina Godibairo odinao ufeisaro Godima emenu merama ukeka sineka mune imuke medinao ufeku ibake weakunea Yesuma eno wei.

*Yesuma i yo sianeka minu dabo waure wei wake we ma boro yari*

<sup>13</sup> Yesuma eno wei, yewa dabo waure wene wake ya iwokaba me ari wei. Iwoka da sifoisa ide moi dabo waure weeka wake aneme aneme iwoka sifoisa wei?

<sup>14</sup> Eno weike wei, i yo waweka miye Godinu wake we eneibaku mi ari enoya wei. Nono i daabae Godinu wake naukaisa orou ari eno.

<sup>15</sup> Enoba i mi Godinu wake we enarakuro i daabaro enareibaisa orou Godinu wake naukaisaro nono seidanima sabu farakuke i wake idua emuabairoma munaku.

**16-17** Enaenari moi oroue i oma duboro sianiro isaka i yobai ari eno. Godinu wake naukaisake rooro ukaisaro Godinu wakebake waa farakuro emenu naukekiae irauaiai me. Enoba i oroue i yobai iini funaku ari ibake i wake naukaisake imuke medaisa.

**18-19** Moi orou emuae i ou ubarenaro isaka yobai ari ibake Godinu wake naukaisake imukeka imusu imusu imukaisake emenu arara erabusa munaisake emenu arara yaisina ukaisake i wakenu daaba ma yaaraisa ibake i wake kai uwane dakaku.

**20** Nono moi orou emuae irauaiai doo ari eno. Enoba Godinu wake naukaisake imukeneewaa ukaisake moi orou keukeunaku naukaisa, i oroue dedi (30) ari naukaisa. Nono moi oroue keukeuwere naukaisa, i arie sikisidi (60) ari naukaisa. Nono i ba moi oroue keuwere naukaisa i arie wani aderedi ari (100) naukaisaya Yesuma eno wei.

### *I okea wowonaro oisa ramefabake wei wake*

**21** Yesuma eno weike nono wei, ramefa biafoisake okea ubarenaro odifoisaba sebo wowonaro odifoisa wei? Eno we nauke erike wei, meya aiso odeka orofaro odifoisaya wei.

**22** Eno weike wei, i oba uke ibinisa eraerabusa yaisina woromifekuke emenu imukaro i fema imukaisa eraerabusa yaisinae ma boroo yafekuro efeisaya wei.

**23** Ya ome bobo orouronae naukenewaa uawe wei. Aneme aneme mafoisaie moko enaenari mufoisaya wei.

**24** Eno weike emuabake nono wei, yanu naukaisa eraerabusa imukenewaa uawe wei. Ya

okoanaku naufoisaie moko ma owere okoanaku mafiakua wei.

<sup>25</sup> Naukeka daiwere naukaku mi dawabairo naukeka moi mafekuke nono i dai menaku mane naukaku mi danu okoanaku naukeka mareke mufekua wei.

### *I warakaisa yobaibake dubo waure wei wake*

<sup>26</sup> Yesuma nono eno wei, Godinu yawokaku odoe yewa wake ariya wei. Moi mima yobai munakuke waiyaro ane farakuke wawaku.

<sup>27</sup> Nono aine wai ure ibakuro yo kaibai kua faraisake warakaisa. Yobai kua aneme aneme faraisake warakaisa ari ibai dawa iwoka me.

<sup>28</sup> Doo mane ma warakakuro kua faraisake kaka uraisake daiwere sinaisake kai uwanaise ayo uraisaya wei.

<sup>29</sup> Ayo uraisaro kaibai ma diwakaisa odo ido farakuba ibake bauma umane kuure munakua Yesuma eno wei.

### *I masida ana kaibake dubo waure wei wake*

<sup>30</sup> Yesuma eno wei, Godinu yawokaku odo abo odo ari wemau wei? Godinu yawokaku odo abodei dubo waure weeka wake ari wemau wei.

<sup>31-32</sup> Godinu yawokaku odoe okoa masida ana kai yo ariya wei. I kai dai mebainakuro wawakuro iroma ana daiwere sinakuro ada yaisina i ana riuro yaure ibaisaya wei.

<sup>33</sup> Godinu dubo waure weeka wakeroma wake keuwere Yesuma eno weibi.

<sup>34</sup> Enoba i wake idua medike Danu iwoka ukekora orou emenu imusu ibisaba i wakenu ubi we ma boroo yariro nauisa.

### *Yesuma kuna ufe we kuuri wake*

**35** Dumudumu siniro Danu iwoka ukekā oroubake Yesuma eno wei, kuna ekabokenaro siraā yafe wei.

**36-37** Eno weiba ibake eme keuwere idua meisake Dawa we waure anisake youro amuisake anisa. Anisake moi orouini youro aneibisaro obeobe daiwere farike ufe daiwere uyariro you inuu yafine ui.

**38-39** Yesu Dawa you barunaro kudo odike aine ibiro ma uyakake eno weisa, Sisa mi, iya feafene ukaisia weisa. A imukakuba me weisa? Eno weisaro uyarike oyauini adua ufeini we kuuriro oyauini adua ufeini idua me sinike me mo ari sini.

**40** Yesuma emuabake eno wei, anemebakē ia iyarada imukena dakaīsa wei?

**41** Yesuma eno weiro imuka foria uisake ia sikake eno weisa, i mide abo miro oyauini adua ufeini Danu wake naukisa weisa.

## 5

*Yesuma i seidaninu merama imumu keuwere rewoke ibisa mi ma wiroi wake*

**1-10** I Gerasini orofaro moi seidaninu merama imumu bobo mima ibeibi. I mi dawae eme feareibisaro ane odeibiriekā i oma eraboro aineibi. Aineibiro i mima iya unao umisia weada ia sinaada i minu umu wana senima uwaneibisaro ma furufuru yareibi ibake emua yaisina dawa yawokenewaa uke dakeibisa. Danu imusu dumuinī ewekaini eme feareibisaro ane odeibiriekā oma eraboroini oraararoini enaada arua weada oma iyabaima danu onami owere umaneibi. Yesuini Danu iwoka ukekā orouma Gerasini orofa kuna ekabokenaro siraā yare ane enaka. Enakake Yesu aweawero amuike

enariro i seidaninu merama imumu bobo mima yafawereroma Yesu erike durame ane Yesubairo ane farike Yesunu ibooro ifoma kodudu yanairo Yesuma i seidaninu merama imumubake eno wei, danu imuka ubarenaroma amua weiro i seidaniu merama imumuma daiwereroma eno wei, Yesu urero ibinu Dai Godinu Amara, nabake aneme ufane ukaku wei? Eno weike wei, Godibairo eno wea na fanisi da mafari wea wei. Eno weiro Yesuma i mibake ma owerike eno wei, anu ibide ainaro wei. Eno weibaie i seidaninu merama imumuma eno wei, nanu ibiye keuvereya weike wei, ibake keuwere ibinisia wei. Eno weike nono wei, yewa orofaroma aniawe da wea wei.

<sup>11</sup> I borosiri keuwerema oraararo ibaada uruna iseibisaro seidaninu merama imumuma Yesubairo eno weisa, wearo anifeke i borosirinu imuka ubarenaro isafe weisa.

<sup>12</sup> Eno weisaro Yesuma ma owerike eno wei, aniawe wei ibake fare anisake borosirinu imuka ubarenaro isaka.

<sup>13</sup> Isakaro i borosiri keuwere du dausini (2,000) durame anisake oraara okoroma kunaro bibi ure isakake imu ise me sika.

<sup>14</sup> Enoba i borosiri yawokeibisa orouma emenu goiro durame anaada i orou yaisinabairo ibai weisaro i goi orou yaisina i kunaro fare ekake Yesubairo ane faka.

<sup>15</sup> Ane fare ekabaie i seidaninu merama imumu keuwere bobo mi danu awara irau siniro danu wau runike yaure ibi ibake i orou ekake ia sika.

<sup>16-17</sup> Ia sikake i orouma i seidaninu merama imumuini borosirinu uisa ibai ekake i faka oroubairo weisaro i goi orouma Yesubake eno weisa, iyanu orofaro da ibiake ania eno weisa.

<sup>18</sup> Yesuma youro amuiro i seidaninu merama imumu me sini mima Yesubake eno wei, naini anifu wei.

<sup>19</sup> Eno weibaie Yesuma ma owerike eno wei, Naini da aarake owere aniake anu goiro Godinu buna imukari ukeka yaisina anu goi oroubairo ane wea wei. Eno weiro i mi idua owere ani.

<sup>20</sup> Anike Dikaforisi orofaro goi yaisina deni (10) ibisa orofaro anike Yesunu bunaini imukari ukekaini ibai yaisina we eneibiro i orou naukada imuka foria ukeibisa.

*Dairasinu arumaini Yesunu wauro ure burike irau sini awekaini emenu wake*

<sup>21-23</sup> Yesu owerike i kuna sira a yare ekara enaro ane enari. Ane enariro eme keuwere Dawa enare kara uisake enare ibisaro i Du orounu moi sosi yawokeibi mi danu ibiye Dairasi dawama aare farike Yesunu ibooro ifoma kodudu yanakada eno wei, nanu arumanaku feafine ukakua aararo anifuke anu wanama danu iiri duboro odiaro irau sifi wei.

<sup>24</sup> Eno weiba ibake Yesuini idua aneibisiro eme keuwere Yesunu umuro anisa.

<sup>25</sup> Moi awekaini anisa. I aweka dawae arama daiwera uike iwa doraada aineibi.

<sup>26</sup> Oya yaisina duwero (12) iwa doraada arama ma wirokeka oroubairo aneibi. Anaada i oya yaisina duwero (12) iwa mane doraada arama ma wirokeka oroubairo anaada danu oi yaisina siane me sinikema nono arama irau sine dauke nono baba ukeibiba ibake anike i wake naui.

<sup>27</sup> Anike nauibaie Yesu enakua weisaro nauike danu imusu eno we imui, animauke Yesunu wau barunaro ure burimauiie i arama wiromaua eno we imui.

**28-29** Eno we imuike Yesunu wauro yabaibaie ena iwa doreibi ibai idua di kuuriba ibake irau sinike Yesunu buna dawabairo ani ibai idua iwoka sini.

**30** I aweka Yesunu wau barunaro ure buribaie Yesunu buna anike i bunama i awekanu arama ma wiroiro Yesu Dawa iwoka sini. Iwoka sinike ibake i oroubairo ma owerike eno wei, nanu wauro ainama ure burisinu wei?

**31** Eno weibaie Danu iwoka ukeka orouma eno weisa, ea, eme keuwere enare kara uke ibinisa orou emuama ure burisisaba aneme ariya weisa? Eno weisake nono weisa, anemebake Na ainama ure burinara weaku weisa?

**32** Eno weisaro Yesu eka ere ewa ere uiba ibake i aweka ia sinike iura mami.

**33-34** Yesunu buna daiwere i awekabairo fare aniba ibake iwoka sinaada Yesunu ibooro aare ifoma kodudu yanaike ba wake weibaie Yesuma eno wei, aruma, ama Na imukeka imukae daiwere imukinu ibake wirokinua ia da siake ania wei. Anu arama idua wirokinua eno wei.

**35** Yesuma eno weibibaie moi mi Du orounu sosi yawokeibi minu uwararoma Dairasibairo aare farike eno wei, anu aruma fearinua i Sisa mibake wake areare da wea wei.

**36** Eno weiro Yesuma nauike Dairasibake eno wei, ia da siake imuka ara ua wei.

**37** Yesuma eno weike i orou yaisina idua medirieke Fidaini Deimisini danu dabue Dionini emua we waure ane i Du orounu sosi yawokeibi minu uwararo fari.

**38-39** Farike nauibaie sorara ukeibisaba Yesuma i sorara ukeibisa oroubake eno wei, anemebake sorara ukaisa wei? I arumanaku feare mero nauka kunawere aine ibinua wei.

**40** Yesuma eno weiro i sorara ukeibisa orou

meisake Yesubairo ririau ukeibisa. Ukeibisaro Yesuma i orou yaisina uwara udiro we odairiero isaka. Isakaro i arumanaku danu amaeini babaeini Fidaini Deimisini Dionini emua mane uwara ubarenaro yaure ibisa.

<sup>41</sup> Ibisaro Yesuma I arumanakunu wanaro munike i Arameia orounu wakeroma eno wei, darida kumi, i wakenu ubiye arumanaku abake ba weakunea uyaa Yesuma eno wei.

<sup>42</sup> Eno weiro i dai sineibi arumanaku uyarike eneibibake i yaure ibisa orouma ekake imuka foria daiwera uisa.

<sup>43</sup> Uisaro Yesuma eno wei, yewa une ubu moi oroubairo da weaweke i arumanaku uruna mawero ifi wei.

## 6

### *Yesu i Nasaredi goi orouma ere meisa wake*

<sup>1</sup> I orofa ido meisake Yesuini Danu iwoka ukeka orouini Danu orofaro anisa.

<sup>2</sup> Moi Sabadi odoro i Du orounu moi sosi uwara ubarenaro isarike we ma iwoka ukeibirie. Eno we ma iwoka ukeibiriero eme keuwere imuisake imuka foria ukaada eno weisa, Danu we ma iwoka ukekaini iwoka ukekae aboroma muninu weisa? Danu iwoka daiwera ainama makinu weisa? Danu ukeka buna daiwera aneme aneme ukaku weiske iya iwoka me weisa.

<sup>3-4</sup> Eno weiske nono weisa, Godima i buna make dauiro yewa miye uwara ma enareka mi manea weisa. Dawa iya ari weiske eno weisa, Danu amae Merini Danu naburaka Deimisini Diosefuini Dudini Saimonini Danu aruarumaini emua iyabairo ibinisaya weisa. Eno weiske Dawabake dino uisaro Yesuma ma owerike eno

wei, Godinu we bou ukeka mi moi orofaro anifekue i orouma Dawabake iifa ufeisa. Nono danu orofaro anifekue danu orouma dawa iifa uke da ufeisake ere medifeisaya wei.

<sup>5</sup> Emuama eno iifa uke da uisaba ibake Yesue buna daiwere uke da ui. I arama ukeibirieka orou mane una demui demui wana emenu ofero ure buriro irau sika.

<sup>6</sup> Emua imuke dauisaba ibake Yesu imuka foria ui.

*Yesuma Danu iwoka ukeka orou duerobake (12)  
waiya marie*

<sup>7</sup> Moi odoro Yesuma goi goiro we ma iwoka uke enereibi.

<sup>8-9</sup> I odoro Yesuma we odaifiero anifisane weiro Danu iwoka ukeka orou duero (12) Dawabairo aare faka. Fakaro una raara raara anifisake seidaninu merama imumu mune siasfisane buna daiwere marieke eno wei, urunaini yoakeini oini da mufoke urini umu fogowoini runeka wau demui demui mane muforo eno wei.

<sup>10</sup> Moi goiro fafoke moi uwara ubarenaro amufoke ibaada yanu wake i uwararo ibifeisa oroubairo we me sifoisaie aniforo eno wei.

<sup>11</sup> Moi uwararo ibifeisa orouma ya da we mufeisake yanu wake da naufeisaie yanu derena emuabairo siaweke yanu umuro doo maisuawero emua mediaki kane ukaada ufoisa ibai emua iwoka sifisaro ania we wei. Eno uawero Godima emua da mufiaku ibai emua iwoka sifisa wei.

<sup>12</sup> Eno weiro anisake Danu wei enaenari i orofa goi goiro eno weisa, yanu merama ukeka sineka imuke mediawe weisa.

<sup>13</sup> Eno weibisake seidaninu merama imumu keuwere we yowereibisake oera munaada

emenu wanama arama uke ibeibisa orou keuwere emenu awararo ma dasidasi ukeibisake ma wirokeibiriekia.

*Dioni babadaido minu feari odobake wei wake*

<sup>14</sup> Eme yaisina Yesunu ukeka sineka iwoka sikake weisaro Erodi, dai gaemani yawokeibi mima i wake nauike ma nuna uiro moi orouma eno weisa, Dioni Babadaido mi fearike uyariiba ibake buna ukeka daiwere ukakua weisa.

<sup>15</sup> Moi orouma eno weisa, yeka miye Eraisaya weisa. Moi orouma eno weisa, Dawae Godinu we bou ukeka mi adinaro we bou ukeka mi ariya weisa.

<sup>16</sup> Eno weisaro i dai yawokeka mi Erodima i wake yaisina nauike eno wei, yewae Dioni. I minu faya nama kuurero fearikema nono uyaria eno wei.

<sup>17-20</sup> Adinaro Erodima danu nabue Firifunu aweka Erodiasi muniro Dionima eno wei, anu nabuenu aweka muneka meramawereya media wei. Eno weiro Erodiasi weaisa i awekama dino uike Dioni ma feafine imui. Eno imuiro Erodi ia sinaada Dioni dawae Godinu irau mi ibai dawa iwoka sini. Dawa iwoka sini ibake Erodiasima ma feare dauike wakema weebe weebe wei. Enoba Erodi danu orou we odairo anisake Dioni mune ana ebaro oisaro Erodima Dioninu wake naufine aneibike naukeibikema nono i wakenu ubi ma nuna ukeibi.

<sup>21</sup> Nono Erodi danu amaema dawa dori odo fariba ibake dawama banau daiwere umanike weiro danu goi dai orouini danu dai meremere orouini Gareri orofa dai orouini emua ido aare faka.

<sup>22-23</sup> Fakaro Erodiasima eno we imui, Dioninu ma feareka odo idua farinua we imui. Erodiasinu

aruma emuabairo aare farike yaura ureibiro banau faka orouini Erodini emua rooro uisaro Erodima eno wei, anu arara anemerabu wearo mamake nanu yawokakune orofa baruna abake mamaane wei.

<sup>24</sup> Eno weiro danu amaebairo ane wei, aneme wemau wei? Weiro danu amaema ma owerike eno wei, aniake Dioni Babadaido minu bokaifu maina wea wei.

<sup>25</sup> Eno weiro owerike Erodibairo ane farike eno wei, Dioninu bokaifu naberoro awoena odiake maina wei. Eno weiba ibake Erodi imukari daiwera ui.

<sup>26</sup> Adinaisa danu bunawere we bou ui wake weiro danu banau uruna iseibisa orou nauisa ibake enaenari ui.

<sup>27-28</sup> Enoba Erodima weiro danu meremere mima ana ebaro anike Dioninu faya kuurike bokaifu naberoro odike owerike i arumabairo aare farike mai. Mairo munike ane danu amae-bairo mairo eri.

<sup>29</sup> Eno uisaro Dioninu umuro eneibisa orouma ibai nauisake ane danu ofe mukake ane eme odeibisa oma eraboro ane oisa.

### *Yesuma i fai dausini (5,000) eme uruna marie wake*

<sup>30</sup> Yesunu iwoka ukekka orou owekake Yesubairo aare fakake emenu ukeibisa ibai yaisina weisa.

<sup>31</sup> Eme keuwere ane fare ane fare eno mane ukeibisaro imu siane uruna ise da uke eno ukeibisaba ibake Yesuma eno wei, eme ibe me orofaro anifeke ko yafe wei.

<sup>32</sup> Eno weiro youro amukaro eme keuwerema emua ekake umuma sabu anisake goi goiroma i orofaro emuako faka.

**33-34** Ane fakaro Yesu youro enarike i orou yaisina erie. I orou yaisina mamoe abu ari. Yawoekeka mi iro meba ibake daaba imusu imusu eneibisa enaenari i orounu imukeka imusu imusu imukebisaba Yesuma emuabake imukari uike emua we ma iwoka ukeibirie.

**35-36** Dumu dumu siniro Yesu Danu iwoka ukekwa orou Dawabairo aare fakake eno weisa, yewae eme ibe me orofaro eweka isafine ukakua wearo goi aboro aboro anifisake uruna oiya ujisane weaisi weisa.

**37** Eno weisaro Yesuma ma owerike emuabake eno wei, uruna mayakawe eno weiro emuama eno weisa, uruna du aderedi kina (K200) oima make mufake anifeke mafiakiro ifisa weisa.

**38** Eno weisaro Yesuma eno wei, aniaweke buredi abea yabairo ibinu ariya ane eawe wei. Eno weiro ane ekake owekake eno weisa, buredi fai ibinuro adua abu kai raarayai ibinisia weisa.

**39-40** Eno weisaro Yesuma eno wei, yaufisa weawe wei. Weiro moi orofaro eme wani aderedi yaukaroo moi orofaro eme fifidi (50) yauka.

**41-42** Danu wei enaenari uke ibisaro Yesuma buredi faini adua abu kai raarayaini munike urero erike Godi Dawa irauaiai we imukada guriguri uike buredi ma bira bira yarie Danu iwoka ukekwa oroubairo marie. Mariero mukake i kuku ukeibisa oroubairo naka naka uisake adua abuini naka naka uisaro isa.

**43** Isaro boana uriero iuwa iuwa mukake bosearo youkaro bosea duero (12) wake faka.

**44** Eme keuwere fai dausini (5,000) i uruna isa.

*Yesu kuna duboroma Danu iwoka ukekwa  
oroubairo ani wake*

**45** Yesu Danu iwoka ukeka orou emuako boudiro amuisake ekara enaro sira a yakake Besaida goiro anisa.

**46-47** Anisaro Yesuma i eme fefera i orofaroma we odairiero anisa. Anisaro nono Dawaē oraararo amuke anike guriguri ukeibi. Guriguri ukeibiro dumu sineibi ibake Danu imusu dooro ibiro Danu iwoka ukeka orounu you kuna abanaro ibi.

**48** Yesuma ereibiro oyau daiwere fariro i orou bara ureibisabaie oyau daiwerekabake you ane dakeibi.

**49** Nono wai ufine ukeibiro Yesu kuna duboro enaada you ma berefine ui.

**50** Eno uiro ekake imumuba aneme ariya weisake ia sinaada weisaro Yesuma eno wei, ia da siaweke imuka ara uwae yewae Naya wei.

**51-52** Eno weike youro amuiro oyau me sini. Oyau idua me siniro Danu iwoka ukeka orou imuka foria uisa. Emenu imuka arawerekabake burendini adua erio abuini i eme fefera mariero isaro boana urie ibai imuke dauisa.

*Yesuma Genesareda orofaro arama imusu imusu ukeibiriekia orou ma wirokeibirie wake*

**53** Kuna ekabokenaro sira a yare ane Genesareda orofaro enaka.

**54** Enakaro eme keuwere Yesu ekake Dawa emua iwoka ibake anisake arama uke ibisa orou we waukake Yesunu yaure ibi orofaro waure farieka.

**55-56** Yesu okoa goiro o badoa goiro o waiyaro aboro aboro aneibiro emenu arama ukeibisa orou waure fakaro eno weisa, anu wau fifiro ure burifeke wiropene farisia weisa. Eno weisake ure burisada irau sineibisa.

## 7

*I adina Du orounu we ma iwoka ukeka wake*

<sup>1</sup> Moibai Ferosi weaisa orouini Mosesinu darawadu we ma iwoka ukeibisa orouini emuama Derusaremu goiroma fakake Yesu fou uka.

<sup>2</sup> Fou ukake ekabaie Danu iwoka ukeka orou uruna iseibisake wana wanadu uke dakeibisaro erieka.

<sup>3-4</sup> I Ferosi orouini Du orouini emenu sisia sivorari bisara eno ukeibaisaya weisa. Uruna ifisane ukaadae wana wanadu ukenewaa ukaisa o sidowa uwararoma faraisaie uruna ise dakaisa. Wana wanaduko ukenewaa ukaisakema ai uruna isaisa. Emenu imukaro eno imukeibisa, Godima emenu imumu inoya wenao ufeku eno imukada ibake eno ukeibisa. Moi bisaradeie, faniginini okeaini naberoini seboini eno mane urokenewaa ukaada ibeibisa.

<sup>5</sup> I Ferosi orouini Mosesinu darawadu we ma iwoka ukeibisa orouma Yesubake eno weisa, Anu iwoka ukeka orou iyanu bisara orounu ukeka wake mune meya weisa. Uruna isaada wana wanadu uke mero uruna isaisaya eno weisa. Eno weisake dino ukaada anemebake eno ukaisa weisa?

<sup>6-7</sup> Eno weisaro Yesuma ma owerike emuabake eno wei, ya sara merama ukaisa orou, Isaiyama yabake owaowa uke odiro eraada enaenari ukaisaya wei. Ya meo bobo oroude Yesuma eno weike wei, yae Isaiyanu yanake odi owaowa enaenari ukaisa wei. Isaiyama eno owaowa uke odi,

yewa orounu imuka arawereba Nabake imukama imukeni mero i wake mane wenewaa ukaisake emenu guriguri Nabairo

me sara ukaisaya wei. Emenu imukeka  
we ma iwoka ukaada ie Godinu imukeka  
weisaya,

Isaiyama yabake eno wei.

<sup>8</sup> Yesuma nono wei, Godinu darawadu uke mero  
emenu bisara ukeka mane imukaisaya wei.

<sup>9</sup> Godinu darawadu eka medaisake emenu bisara  
ukeka mane imukaisaya eno wei.

<sup>10</sup> Mosesima eno wei, yanu amae babaenu  
wakeini muneibiaweke yawokeibiawe wei. Eno  
weike nono wei, ainama danu amaeini babae-  
bake wake meramawere wefekuie ure bauawero  
feafi Mosesima weia eno wei.

<sup>11</sup> Nono yama eno weaisa, moi mi danu amae  
babae bake eno weaku, nanu ararae yabairo me  
makeka mamiauroma nono i me makeka eraer-  
abusae kobani ibake yabake da mamiau wefekua  
wei. I wakenu ubiye Godibairo me makeka ibake  
da mamiaua eno wefekua weaisa.

<sup>12-13</sup> Eno weaisaba danu amae babae bake da  
unu kofekuba ibake Godinu amae babae unu  
koreka darawadu wake mune sianaisake emenu  
bisara ukeka mane ma uyaraisaya wei. Yanu  
bisara ukekadeie enaenari ukaisaba ibake moi  
oroubairo we ma iwoka ukeibaisaya Yesuma eno  
wei.

*I emenu imuka ma iga ukaku eraerabusanu  
wake*

<sup>14</sup> Moi odo Yesuma eme keuwere weiro aare  
fakaro Dawama eno wei, Nanu wake nauke-  
newaa uaweke iwoka siawe wei.

<sup>15</sup> Uruna yaisina moi minu boana ubarenaro  
anifeisaie ima danu imuka da ma merama  
ufeisaya eno wei. Da ma merama ufeisaro imuka

ubarenaroma amufeisaro wefekuie ima dawa ma  
merama ufekua eno wei.

<sup>16-17</sup> (Ome bobo orou ya nauawe!) Eno weike  
i orou yaisina ido medirieke uwara ubarenaro  
amuiro Danu iwoka ukek a orouma ma owe kake  
eno weisa, i dubo waure wenu wakenu ubi  
aneme aneme arie weisa?

<sup>18-19</sup> Eno weisaro Yesuma eno wei, ya iwokaba  
me wei? Uruna yaisina moi minu imukaro da ani-  
feisake desini duraro anifeisake nono dubuenaro  
wisi akeka orofaro afeisabake i urunama i mi ma  
merama da ufeisaya eno wei. Eno wei ibake i  
uruna yaisinae irauaiaiaya Yesuma eno wei.

<sup>20</sup> Aneme aneme imuka ubarenaroma amufeis-  
aro wakema wefekuie ima i mi ma merama  
ufekua eno wei.

<sup>21-23</sup> Eno weike nono wei, imukaroma merama  
imukeka keuwere amufeisiai e ima i mi ma  
merama ufeisaya wei. Merama imukekaini  
moi orounu aruaruma enare odekaini waira  
ukekaini eme urekaini moi minu aweka enare  
odekaini fukeru uke naisama ure owere ma  
owere ukekaini imuka ka ukekaini we irukekaini  
merama ukekaini meo wayai weekaini meo  
weekaini imukama fukeru ukekaini we mero me  
sara ukekaini i yaisina imukaroma me nauwaro  
amukaisa ima i mi ma merama ukaisaya Yesuma  
eno wei.

*Moi aweka danu naukekama danu arumanaku  
ma wiroi wake*

<sup>24</sup> Yesuma eno weike i orofa ido medike Daira  
goi ubiubi orofaro fari. Farike moi uwara ubare-  
naro fenaku amuik ibiro i orou iwoka sika.

<sup>25</sup> Moi aweka danu arumanaku seidaninu  
merama imumu bobo ibake dawama Yesu fare  
ibibai nauike ido aare farike ifoma kodudu yanai.

**26** I awekae Du aweka me, dawae Guriki orofa aweka. Danu goiye Sairofonisia. I awekama faraada ifoma kodudu yanaike eenu wei, i seidaninu merama imumu nanu arumanakunu imuka ubarenaro ibinua we beraa wei.

**27** Eno weiro Yesuma ma owerike eno wei, amara aruma uruna iseibisaro boana ureibiriero kuasiribake makeibisaro iseibisaya wei. I dubo waure wei wakenu ubiye eno, Du oroma Godinu wake emuako bokai mufeisaro nono i imusu orou Godinu wake dubuenaro mufeisaya weadama dubo waure wei.

**28-29** Eno weiro i awekama ma owerike eno wei, Dai mi, ba weakua wei. Eno weike nono wei, i kuasiri amarananakunu uruna ifuru iseifeisaya weibaie Yesuma eno wei, i wake ibake eno wenuro seidandinu merama imumu ainua ania wei.

**30** Eno weiro anike ane uwararo farike eribaie seidandinu merama imumu aniro i arumanaku me aine ibiro eri.

### *Yesuma moi gogore bobo mi ma wiroi wake*

**31** Yesu nono owerike Daira goi ubiubi orofa medike Daira goi ubiubiroma anike Saidoni goini Dikaforisi orofaini ma bereike Gareri kuna udiro fari.

**32** Iro ane fariro moi orouma wake naukenewaa meke wake wenewaa me mi we waure fakake eno weisa, Anu wana yewa minu iiri duboro odia weisa.

**33-34** Eno weisaro Yesuma i mi aweawero waure anike Danu wana i minu ome ebaro sianike wisiomu uike i minu meanaro ure burissada urero erike imu sianada i Arameia orounu wakeroma eno wei, efada, i wakenu ubiye ure woromia wei.

<sup>35</sup> Eno weibaie i mi ido wake nauike irauaiai wake wei.

<sup>36</sup> Wake weiro Yesuma emuabake eno wei, yewa unebaieme moibairo da weawe wei. Weiro nauke meisake eme moibairo ane weisa.

<sup>37</sup> Weisaro nauisake emenu imuka foria dai-were uisake eno weisa, Danu ukekaya sisina ukenewaa ukakuba ibake i ome gogore orou wake naukaisaro i wake we dakaisa orou wake nauke we eno ukaisaya weisa.

## 8

### *Yesuma fo dausini (4,000) eme uruna marie wake*

<sup>1-2</sup> Moi odo eme keuwere ku uisa. Ku uisaro uruna mebake Yesuma Danu iwoka ukeka oroubairo weiro fakaro wei, i orou Nabairo eweka odo buuba ibinisaro uruna mero emuabake imukari ukakuniaya wei.

<sup>3</sup> Eno weike wei, we odaimiauro anifeisiai emenu goiyafawereba daabaro anaada desinima feafeisiaya wei.

<sup>4-6</sup> Eno weiro Danu iwoka ukeka orouma eno weisa, eme ibe me orofaro uruna aboro mufekte mafero ifisane weaku weisa? Eno weisaro Yesuma ma owerike eno wei, yabairo buredi abea ibinu wei? Weibaie seweni (7) mane ibinisaya weisaro Yesuma i ku uke ibisa oroubake eno wei, yauawe weike buredi munike Godi we ma irauaiai ukaada guriguri uike ma birabira yarike Danu iwoka ukeka oroubairo mariero mukake emuama i orou mariekaro isa.

<sup>7</sup> Adua abua dai mebainakuini enaenari uike makaada yewaini mayakawe weiro mukake emuama mariekaro isa.

<sup>8</sup> Isaro boana uriero iuwabai bosea seweni (7) youkaro wake faka.

<sup>9</sup> Eme keuwere fo dausini (4,000) uruna isa. Yesu emua we odairiero iroma anisa.

<sup>10</sup> Anisaro Yesuini Danu iwoka ukeka orouini youro anisake Damanuda orofaro ane enaka.

*I Ferosi orou Yesunu buna efisane weisa wake*

<sup>11</sup> Moi Ferosi weaisa orou fakake uraneka wake weisake Yesu we nauke eraada eno weisa, Anu buna ukeka uaro ureromafafiro efe weisa.

<sup>12</sup> Weisaro imuka merama uike imu sianada eno wei, yewa orou anemebake moi buna ukeka yodia ukaisa wei? Eno weike wei, Nanu wake wemaro nauawe wei, moi buna ukeka yewa oroubake da we foramiaua weike i orou idua medi.

<sup>13</sup> Idua medirieke youro amuike sira a yare ekabokenaro ani.

*I Ferosi orouini Erodi orouini emuabairo wawareka iraa yisidibake wei wake*

<sup>14-15</sup> Yesunu iwoka ukeka orou buredi keuwere mune dausake kai demui mane mukake anisaro Yesuma i Ferosi orouini Erodi orouini emenu meo we ma iwoka ukekabai imuiké Dawama eno wei, i Ferosini Erodi weaisa orounu wawareka iraa yisidi eforo wei. Wawareka iraa yisidi dai mebainaku odifeisaro daiwere ure wawafeku enaenari emenu we ma iwoka ukeka daiwera ufkuro eme keuwere naufesisaya wei.

<sup>16</sup> Eno weiro emenu emenu we makanada eno weisa, iyanu buredi mune dakisiba ibake weakua weisa.

<sup>17</sup> Eno weisaro Yesuma emenu weibisa wake iwoka sinike wei, anemebake buredi wake

weaisa wei? Ya iwoka sinenewaa meya wei. Yanu imukae arawere ibake oide ibinua wei.

<sup>18</sup> Eno weike nono wei, ya naisa bobo orou eraisakema nono ba bai ere dakaisaya wei? Eno weike wei, ya ome bobo oroue naukaisakema nono ba bai nauke dakaisaya wei. Ya ibai imukaisaba me wei?

<sup>19</sup> Yesuma eno weike wei, adinaro buredi fai (5) ma birabira yarero eme keuwere fai dausini (5,000) isaro iuwabai bosea abea youisa wei? Eno weibaie bosea duero (12) youisia weisa.

<sup>20-21</sup> Eno weisaro Yesuma wei, buredi seweni (7) ma birabira yarero eme keuwere fo dausini (4,000) isaro iuwabai abea bosearo youisa wei? Eno weibaie bosea seweni (7) youisia weisaro nono wei, Na i ue enaenari umauroma awoena iwoka sinalisaba me wei? Uruna mane da imuaweke irau naukekaini ukekaini eno imuawe wei.

### *Yesuma Besaida goiro moi naisa kikori bobo mi ma wiroi wake*

<sup>22</sup> Besaida goiro aare fakake enare ibisaro moi orouma moi naisa kikori bobo mi waukake faraada eno weisa, yewa mi ure buriaro wirofi weisa.

<sup>23</sup> Eno weisaro Yesuma i minu wanaro munike goi derena enaro waure ani. Derena enaro waure anike i minu naisaro wisiomu uike wana iiri duboro odaada eno wei, erakuba me wei?

<sup>24</sup> Eno weiro i mima eno wei, na eme enaraisaro erakunea wei. Eno weike, ana ari enaisaro erakunea wei.

<sup>25</sup> Eno weiro Yesuma Danu wana nono iiri duboro odiro naisa foraike ereebe irau sinaada erenewaa ui.

**26** Eno uiro Yesuma eno wei, i Besaida goiro da aniake anu goiro owere ania wei.

*Fidama Yesu we ma boroo yari wake*

**27** Yesuini Danu iwoka ukeka orouini Sesaria Firifai goi goiro anisa. Aneebe Yesuma eno wei, i orouma Nabake ainadei weaisa wei?

**28** Eno weiro emuama eno weisa, moibaima Abake Dioni Babadaido fearekaroma uyari miya weaisaro Godinu bukaroma weaku, Iraida dawakofafeku weaku ibake moibaima Abake Iraida weaisaro nono moibaima Abake Godinu moi we bou ukeka miya weaisaya weisa.

**29** Eno weisaro Yesuma ma owerike eno wei, nono yadeie Nabake ainadeia weaisa wei? Yesuma eno weiro Fidama wei, Ae Godinu Kerisoya wei.

**30** Eno weiro Yesuma eno wei, i wake moi oroubairo da weawe wei.

*Yesu Danu oferi waufike feafine wake nono wei*

**31** Yesuma moi wake emuabake eno wei, i Ba Eme Sini Mima oferi daiwere waufekuro bisara orouini ofereni ode sibore sianeka orouini Mosesinu darawadu we ma iwoka ukaisa orouini emuama Danu wake da naufeisake Dawa ma feafeisaro feafekuro eweka odo buuba me sifekaro nono uyafekua wei.

**32-33** Eno weiro nono Fida dawa arara me Yesuma feareka wake wei ibake ma owerike Yesubairo we iifa ui. Eno uiro Yesu owerike Danu iwoka ukeka orou erike Fidabake eno wei, seidani Nanu derena enaro ania wei. Anu imukekae Godinu imukekka ari mero emenu imukekka imukakua Yesuma bunawereroma eno wei.

<sup>34</sup> Dubuenaro Yesuma i orouini Danu iwoka ukeka orouini emuabairo u weiro fakaro eno wei, ainama Nanu umuro aafine ufekuie danu arara ukeka eraerabusa yaisina medifike irau ukeka korosi ari mufike Nanu umuro aafie wei.

<sup>35</sup> Eno weike wei, moi mima yewa orofaro me ibifine imufekui dawa ido feafekua wei. Yesuma eno weike wei, nono moi mima Naini Godinu wakebake feafekui dawa nono uyafekuke me ibene ibene ibifekua wei.

<sup>36</sup> Ainama i orofa akakanu eraerabusa yaisina mufekuro danu me ibeka imumu i merama orofaro fe yafekui irauaiaiba me wei? Eno we nauike wei, ie irau meya wei.

<sup>37</sup> Danu me ibeka imumu aneme aneme make mufekuke anemeke ane ma owere mufeku ari weike nono wei, i ari eno da ufekuwei.

<sup>38</sup> Yewa odoro eme keuwere Godinu wake nauke dakaisake merama mane ukaisa. Enoba ainama i ari eno ukaada Godinu wakebake maru ufekuie i Ba Eme Sini Mini Danu buna aneruini Danu Babaenu bunaini arakekaini idua fafeisiai i mibake moko maru ukaada dawa medifekua Yesuma eno wei.

## 9

<sup>1</sup> Yesuma moi wake emuabake eno wei, Nanu wakeye ba weakunea wei. Moi yewado enare ibinisa orou da feafeisaro Godinu yawokaku odoko bokai bunawere ukefafekuro efeisakema ai feafeisaya Yesuma eno wei.

*Yesunu iboo naisa imusu uike nono irau sini wake*

<sup>2-3</sup> Odo sikisi (6) me siniro Yesuma Fidaini Deimisini Dionini emua we wauriro dai oraararo

amuke anisa. Amuke anisake i oraararo ibisaro Yesu Danu iboo naisa imusu uiro Danu wau edoroini ou ari inanakeo sini. Moi wau urokeibaku mi i ari eno wau uroke dakeibaku.

<sup>4-5</sup> Iraidaini Mosesini emua me ari uke fakike Yesubairo wake weibisiro ekake Fidama Yesubake eno wei, Dai mi, ewado irauaiai ibinisiba ibake okoa uwaranananaku deibuuba Anu moi, Mosesinu moi, Iraidanu moi ma enafeisiba me wei?

<sup>6</sup> Emua ia daiwere iyakake ibake eno wei.

<sup>7</sup> Eno weibaie ouma ma yaariro ou ubarenaroma wake isare aarike eno wei, yewae Nanu Amara ubiya Danu wake naukeibiawe wei.

<sup>8</sup> Eno weiro sabu ekabaie moi miyai iro mero Yesu mane enare ibiro eka.

<sup>9</sup> I oraararoma isare aarada Yesuma eno wei, i oraararo erisa ibai moi oroubairo da weforo wei. I Ba Eme Sini Mi Dawako fearekaroma uyafekuiie ido we boroo yafoisaya wei.

<sup>10</sup> Eno weiro nauisake emenu emenu we makakake eno weisa, fearekaroma uyafekude anemedei arie weisa?

<sup>11</sup> Eno weisake Dawabake nono weisa, i Mosesinu darawadu we ma iwoka ukaisa orouma eno weaisa, Iraida dawako aafekuro i Keriso Dawa dubuenaro aafeku ideie anemebake eno weaisa weisa?

<sup>12</sup> Eno weisaro Yesuma ma owerike eno wei, ba weakunea, Iraida dawako farike ibaada yaisina uke boubou ukeibia wei. Godinu bukaroma i Ba Eme Sini Mibake eno weaku, Dawae oferi daiwere waufekuro Dawabake imuka ka ufeisaya eno weaku.

<sup>13</sup> Yesuma Dioni Babadaido mibake imukada dubo waure weike eno wei, Iraida fariro

dawabake merama uke yaraada emenu arara erabusa ukeibisa, Godinu bukaroma eno weakua Yesuma eno wei.

*Yesuma moi seidaninu merama imumu rewoke ibi amaranaku ma wiroi wake*

<sup>14</sup> Yesuini Danu iwoka ukeka orou una buubaini Danu eneiareibisaro iwoka ukeka oroubairo aare fakake ekabaie eme keuwere enare kara uke ibisa. Yesu Danu iwoka ukeka oroubairo enare kara ukaro i Mosesinu darawadu we ma iwoka ukeibisa orouini moi iwoka ukeka orouini dino wake we makanada enare ibisa.

<sup>15</sup> Enare ibisaro Yesu ido fariro ekake emenu imuka foria ukaada Yesubairo durame ane fakake arie weisa.

<sup>16-17</sup> Arie weisaro Yesuma wei, aneme wake weaisa wei? Eno weiro moi mima i ku uke ibisa orounu kuroma uyarike eno wei, nanu seidaninu merama imumu bobo amaranaku waure fanea wei.

<sup>18</sup> Eno weike wei, i seidaninu merama imumuma nanu amaranakunu wake weeka daaba enare yaarakuke nono moi odo mune sianakuro isare uraada begiri farakuke nio ake fagigi yaraada danu ofe bedada ukaku ibake waure fanea wei. Anu iwoka ukeka oroubairo wenero i seidaninu merama imumu we berake dakisaya wei.

<sup>19</sup> Eno weiro Yesuma ma owerike eno wei, yae imukenewaa uke dakaisa oroua wei. Yabairo odo abea ibimauro imukenewaa ufoisa wei? Yesuma eno weike nono i mibake eno wei, anu amara waure aara wei.

<sup>20</sup> Eno weiro Dawabairo waure fariro seidaninu merama imumuma Yesu erike i amaranaku

ma birubiru uike mune sianiro dooro isare urike iura mamaada bebekuroma begiri fareibi.

<sup>21</sup> Eno ukeibiba ibake Yesuma danu babaebairo eno wei, odo abea eno ukaku wei? Eno weiro wei, okoanakuroma eno uke eneiyarakukema awoena dai sininua wei.

<sup>22</sup> Moi furo inaa domearoini aduaroini feafine mune sianeibakua wei. Enoba A imukari ufakuke unu kofakuba me wei?

<sup>23</sup> Eno weiro Yesu ma owerike eno wei, aneme-bake ufakuba me weaku wei? Ainama imuke-newaa naukenewaa ufekuie yaisina enaenari ufekua wei.

<sup>24</sup> Eno weiro i amaranakunu babaema daiwera eno wei, na imukakunea wei, nanu imukekae okoanakuba ibake Ama na unu kofarine weakunea wei.

<sup>25</sup> Eno weiro i ku uke ibisa orou durame aareibisa ibake Yesuma i seidaninu merama imu-mubake eno wei, nauke me wake we me imumu anifake nono da owere aafao wei.

<sup>26</sup> Yesuma eno weiro i seidaninu merama imu-muma imuka ubarenaroma arua daiwera weike i amaranaku ma birubiru uike fare ani. Fare aniro i amaranaku fearaisari uike aine ibiba ibake moi orouma ekake eno weisa, dawa fearinua weisa.

<sup>27</sup> Eno weisaro Yesu danu wanama mamike ma uyariro uyare enari.

<sup>28</sup> Yesuma uwara ubarenaro amuiro Danu iwoka ukeka orouma fenakuma eno weisa, yeka seidaninu merama imumu anemebakwe berake dakisi weisa?

<sup>29</sup> Eno weisaro Yesuma eno wei, yanu guriguri ukeka ima we berafoisaya wei.

*Yesu Danu fearekabake wake nono wei*

**30-31** I orofa ido meisake Gareri orofa ma bereisa. Yesu Danu iwoka ukeka oroubake we ma iwoka ufine fema anisake eno we ma iwoka ukaada eno wei, i Ba Eme Sini Mi moi orounu wanaro mame odifeisaro emuama mufeisake ma feafeisaro eweka odo buuba me sifekuro nono fearekaroma uyafekua wei.

**32** Eno weiro Danu wake iwoka sine da uisake ia sikake i wakenu ubi Yesubairo we nauke ere dauisa.

### *Aina mima daiwerea wei wake*

**33** Kafenamu goiro aare fakaro Yesuma moi uwara ubarenaro amuike Danu iwoka ukeka oroubake eno wei, daabaro aarada aneme wake we aarisa wei. Eno weiro wake muu uisa.

**34** Emua enaada uraneka wake weibisa. Eno weisake weisa, ainama dai mi sifeku weisa? Eno weibisaba ibake Dawama we nauke eriero moko wake we dauisa.

**35** Yesu yaurike u weiro Danu iwoka ukeka orou Dawabairo fakaro emuabake eno wei, ainama dai mi sifine ufekuie i mi dawako okoa mi sifekuke eme yaisina unu koreka mi sifekua wei.

**36-37** Eno weike moi amaranaku munike aroro ma enare odike yabakada eno wei, ainama moi amaranaku mufekuie dawa Na mufarakua wei. Dawa Na mufarakuie dawae Na we odai Godini mufekua wei.

### *Yesuma wei ainama yaini wasai uke meie dawa yanu naiyeya eno wei*

**38** Dionima Yesubairo eno wei, Sisa mi, moi mima seidaniu merama imumu we berake ibiro ekike eno weisi, media weisike iyanu buriro enareka mi meya media weisia wei.

**39** Eno weiro Yesuma wei, mediaweke i wake da weawe wei. Ainama buna ukeka Nanu ibiro ukeibakuie dawa wake merama Nabake we dakeibakua wei.

**40** Ainama yaini Naini wasai uke dakakuie dawa yaini Naini iyanuunu koreka miya wei.

**41** Yesuma eno weike wei, yae Kerisonu umuro enaraisaba moi mima yabake adua ifone mafikuro Godima ibai da imuke medifekuke nono i mibake moko mafekua wei. Enoba yabairo wenewaa ukakunea wei.

*Moi mima moi mi ma merama ufine weaku wake*

**42** Godima i merama ma iwoka ukaisa orou fanisi daiwere mafiaku ibake yewa wake eno wei, moi mima Nanu wake naukaisa amaranakubairo ba me ukeka ma iwoka ukekuro meramawere unao ukekuro ibake i mi i ba me ma iwoka uke me i furo i minu fayaro naama dai omawere doifeisake kunaro siafeisaro imu ifironiae irauaiaiya Yesuma eno wei.

**43** Anu wanama a ma merama umekuie umane kuure siafakuie wana demui mane ibifakuie irauaiaiya wei. Wana raarayaini feare me inaaro anifakuie meramawere enoya anu moi wana umane kuua wei.

**44** (Iro i yareibaku inaaro anifeisaro i dofema emua iseifiakaisaro nono inaama emua yareifiakua wei.)

**45** Anu umuma a i merama daabaro mune odaimekuie umane kuuake umu demui mane i me ibene ibene ibeka orofaro anifakuie irauaiaiya wei. Umu raarayaima inaa yaraku orofaro anifakuie i inaae meramawere enoya anu umu umane kuuake siaa wei.

**46** (Iro i yareifeku inaaro anifeisaro i dofema emua iseifiakaisaro nono inaama emua yareifakua Yesuma eno wei.)

**47** Anu naisama a ma merama umekuie i naisa ma doroo yaake mune siake naisa kai demui mane Godinu yawokaku orofaro eno uke anifakuie irauaiai ya wei. Nono naisa raarayai bobo inaa yaraku orofaro anifakuie meramawereya wei.

**48** Iro i yareifeku inaaro anifeisaro i dofema emua iseifiakaisaro nono i inaama emua yareifekua wei.

**49** Eno weike Yesuma nono wei, i irauaiai ukekka sinekae i damenama ma imuna ukakuro irauaiai imuna ukaku uruna ari. Enoro emema emenu auri inaaro yare fidema ma gienabu ukaisari Godima danu orou inaama yare ma giena unao ukaku. Eno ukaada emenu naukeka ma arabi ufine ibake arabi inaama yaare ma giena ukaku.

**50** I damenae irauaiai ya wei. Damenanu imuna me sifiro danu imuna nono aneme aneme odiofoisa wei? I enaenari ya irauaiai da ufoisiai ya imuna me damena ari. Enoya ya imuna damena ari sine ibiawe wei. Eme yaisinabake yanu yanu imukari uke makanada irauaiai uke makaneibiawei.

## 10

*Yesuma awekabo emenu emeaka medaisabake  
wei wake*

**1** Yesu i orofa medike iroma Diudiaini Diodeni orofayairo ane farike i Diodeni adua sira yare ibiro i orou Dawabairo fakake enare kara ukeibisaro Yesu Danu adinaro we ma iwoka ukeibirie enaenari ukeibi.

<sup>2</sup> Eno ukeibibaie i Ferosi weaisa orouma Yesubairo we iruke efisane fakake we naukake eno weisa, moi mi danu aweka me sara medifekude irauba merama weisa? Danu moko wakeye aneaneme wefibai naufisane ibake eno weisa.

<sup>3</sup> Eno weisaro Yesuma ma owerike eno wei, i Mosesima yanu sisia sirorari oroubake aneme weiro nauisa?

<sup>4</sup> Yesuma eno weiro emuama eno weisa, Mosesima eno wei, moi mi danu aweka medifine kodo fefa i kodo yawokeka mibairo mufekuke danu awekabairo mafekukema nono ai medifeku weia weisa.

<sup>5</sup> Eno weisaro Yesuma emuabake ma owerike eno wei, yanu imuka arawereba ibake Mosesima eno weibia wei.

<sup>6</sup> Godima emeini awekaini emua ma dakaa ufekuie moi mima da ma fiafiakua wei.

<sup>7</sup> Adinarowere Godima orofa akaka yaisina odaada emeini aweka ubu urieba ibake emema danu babaeini amaeini medifekuke danu awekabairo dakaa ufekuro emuae demui ari eno sifisisia wei.

<sup>8</sup> Ibake emuae rarayai mero emuae una demui.

<sup>9</sup> Godima emeini awekaini emua ma dakaa ufekuie moi mima da ma fiafiakua wei.

<sup>10-11</sup> Dubuenaro uwara ubarenaro danu iwoka ukeka orouma Dawabake i wei wake we nauke ekaro ma owerike eno wei, moi mima danu aweka medifekuke moi awoena aweka dawa ido mufekuie i mi danu awoena awekaini dodoo ukefisisiie danu adina awekanu ibeka ma merama ufekua wei.

<sup>12</sup> Yesuma eno weike nono wei, moi aweka danu eme medifekuke moi eme mufekuke danu awoena emeini dodoo ukefisisiie danu adina emenu ibeka ma merama ufekua wei.

*Yesuma oka amarananaku we ma irauaiai ui wake*

<sup>13</sup> Moi orouma emenu amarananaku Yesubairo waukake wanama iiriro odifine faka. Fakaro Danu iwoka ukeka orouma dino wake weisa.

<sup>14</sup> Eno weisaba ibake Yesu dino uike emuabake bunawereroma eno wei, da we kuuawe wei. I amarananaku Nabairo aafisane weakunea wei. Godinu yawokaku orofae emenu ibake aafisane weakunea wei.

<sup>15</sup> Eno weike nono wei, ya amarananakunu ure ribuku ukaisa enaenari da ufoisake eme unu kofiakaisaie ya Godinu yawokaku orofaro da anifoisaya wei.

<sup>16</sup> I amarananaku moi wanama yabakeibike nono moi ena wanama mune iiri duboro odaada we ma irauaiai ukeibi.

*I eraerabusa keuwere bobo minu wake*

<sup>17</sup> Yesuma i orofa medike daabaro ani. Daabaro aneibibaie moi mi durame eneebe farike ibooro ifoma kodudu yanakada eno wei, irau Sisa mi, na aneaneme umauke me ibene ibene ibimau wei?

<sup>18</sup> Eno weiro Yesuma ma owerike dawabake eno wei, anemebakne nabairo irauaiai me weaku wei. Eno weike wei, moi mima irauaiai meya wei. Godi Dawa mane irauaiai eno wei.

<sup>19</sup> Godinu darawadu a iwoka sinaku wei. Eme da ma fea, naiyenu awekanu umuro da yowea, waira da ua, da we irua, wayai wake weada meo da wea, anu amaeini babaeini irauaiai riroke-newaa ua wei.

<sup>20</sup> Eno mane weiro i mima Yesubake nono wei, Sisa mi, na okoanakuroma eno ukeibakunea wei.

<sup>21</sup> Eno weiro Yesuma i mibake imukari ukaada weike nono wei, dei demui mane eno ufaku wei, aniake anu eraerabusa yaisina oiya uke

make oi muake erabusa me oroubairo anu oi yaisina mayanake Nanu umuro aara wei. Anu eraerabusa mafaku i ari enoe anu urero enaenari mafekuro mufakua wei.

<sup>22</sup> Eno weibaie i minu eraerabusa daiwere ibake danu iboo imusu odaada imuka merama imuike Yesu medike owere ani.

<sup>23</sup> Yesuma Danu iwoka ukeka oroubake owe-owere ukaada eno wei, eraerabusa daiwere bobo mi dawa Godinu orofaro anifine ukaadae ara daiwere ukekua wei.

<sup>24</sup> Eno weiro emenu imuka foria daiwere uis-aro Yesuma nono wei, adara, Godinu yawokaku daabaro anaada ara daiwere ukeibaisaya wei.

<sup>25</sup> Eno weike nono eno wei, kemo abuma bobo ebaro fare anakuro ara dakakuroma nono i eraerabusa keuwere bobo mima Godinu yawokaku daabaro anaadae ara daiwere ukekua eno wei.

<sup>26</sup> Yesuma eno weiro kawama naukake foria daiwere ukaada eno weisa, ainama wiropfeku weisa?

<sup>27</sup> Eno weisaro Yesuma emua eraada nono wei, Nama i wene ibai emema da ufeisaie Godima i yaisina ukekuke Dawa mane i orou ma wiropfakua wei.

<sup>28</sup> Eno weiro Fidama eno wei, aruarumananakuini amarananakuini eraerabusini yaisina meisike anu umuro aaraisia wei.

<sup>29</sup> Eno weiro Yesuma ma owerike eno wei, Nanu wake naukeneawaa uawe wei.

<sup>30</sup> Ainama danu uwairaini daburakaini aruarumaini amae babaeini amara arumaini dooini yaisina Godinu wakeini Nabake medifine dubuenaro danu uwairaini amarananakuini aruarumananakuini amaeini kuaboroini dooini medifeku i ari keuwere urero moko mufekuke nono

i waa uyarekaini mufekuiie nono dubuenaro me ibene ibene ibifeikua wei.

<sup>31</sup> Eno weike nono wei, moi yewa dooro dai-were sine ibinisa oroue iro okoanaku sifeisaya wei, nono moi Godinu waiya ukaisa orou emuae yewa dooro okoananaku nono iro amufeisaiie daiwere sifeisaya Yesuma eno wei.

*Yesu Danu feafuku wake nono wei*

<sup>32</sup> I Derusaremu daabaro Yesuko bokairo amuke aneibi. Amuke aneibiro Danu iwoka ukeka orouma Danu wei wakebake imuka foria uisake iro amuke anisaro nono moi orou ia sikake amuke anisa.

<sup>33</sup> Yesuma Danu orou yaisina duero (12) murieke emenu imusunaku anaada i dubuenaro ufeku ibai eno wei, Derusaremu goiro anifero moi mima Na i Ba Eme Sine Mibake wayai wake wefekuke mune i dai ofereni ode sibore sianeka orouini nono i Mosesinu darawadu we ma iwoka ukaisa orouini emuama Dawa mufeisake ma feareka wake weifeisaya wei.

<sup>34</sup> Eno ufeisake i imusu orounu wanaro mafeis-aro mufeisake uke irufeisake wisiomu ufeisake mobuma ufeisaya wei. Eno ukeebe nono ma feafeisaro feafekuro odo buuba me sifekuro nono iroma uyafekua eno wei.

*Deimisini Dionini emuama Yesubairo eenu weisi wake*

<sup>35</sup> Debedinu amarayai Deimisini Dionini emuama Yesubairo fakike eno weisi, Irau Sisa mi, uwani imukaisu rabu uwabake mamukuba me weisi? Eno weisiro Yesuma ma owerike emuabake eno wei, yabake anemerabu mamiane weaisi wei?

**36-37** Yesuma eno weiro emuama nono weisi, Anu buna yawokaku odofafiro Anu ba ena wana enaroini Anu ewani ena wana enaroini yaufune weaisua weisi.

**38** Eno weisiro Yesuma nono wei, yanu we nauke erekae ya iwoka mero me sara weaisia wei. Na ure yanake ukeifeisaro yaini enaenari enare ara ufuaisiba me wei?

**39** Eno weiro emuama nono weisi, euwa enaenari ufukua weisi. Eno weisibaie ba weaisia wei. Eno weike nono emuabake eno wei, Na ure yanake ukeifeisaro enaenari ufuaisike Nanu babadaido umau enaenari ufuaisia wei.

**40** Eno weike nono wei, i yaureka orofayaie nanu meba ya da mamiauro da yaufuasia wei. Moi oroubake Godima i orofa uke bou uiba Dawama wefekuro yaufeisaya wei.

**41-42** Yesu Danu moi deni (10) iwoka ukekaorouma i weisabai nausake Deimisini Dionini dino uke yariekarlo Yesuma emuabake u weike eno wei, I imusu dai yawokeka orou emenu oroubairo arawere yawokada emenu imukeka emuabairo arawere odaisaro ya ibai iwoka sinasaya eno wei.

**43** Enoba emenu ukaisa i ari eno ya uke dakaisa ibake yabairoma ainama dai mi sifekuiya yaisina unu kofiakua wei.

**44** O ainama bokai mi sifekuiye dawama yanu waiya ukeka mi sifekua wei.

**45** I Ba Eme Sini Mi ido fariro emema Dawa unu kore da uisaro Dawama emua unu kofiane fari. Nono dubuenaro danu wirokeka iwama eme keuwerebake isafeku ibake eme keuwere make munao ari ufkuro irau sifeisaya eno wei.

*Yesuma naisa kikori bobo mi Badimiasi ma wiroi wake*

<sup>46</sup> Yesu Deriko goiro fare anaada Danu iwoka ukeka orouini moi eme keuwere iroma Danu umuro aneibisaro Dimiesinu amara Badimiasi dawa naisa kikori boboba ere dakaada eenu moi oroubairo weibi mi. Dawama daaba udiro yaure ibi.

<sup>47</sup> Yaure ibiro Yesu farike aneibiro Dawa Yesu Nasaredi goi mi weisaro nauike u weike eno wei, Deiwidinu sisia sirorari mi Yesu nabake imukari ua wei.

<sup>48</sup> Eno weiro Yesunu umuro enereibisa orouma fakake eno weisa, wake da wea weisabaie nono daiwera u weike wei, Deiwidinu sisia sirorari mi Yesu nabake imukari ua wei.

<sup>49</sup> Eno weibi ibake Yesu iduama enarike eno wei, i mibake nabairo aafi weawe wei. Eno weiro naisa kikori mibake eno weisa, da ia siake uyaa weisake nono weisa, Yesu abake u weakua uyaa weisa.

<sup>50</sup> Eno weisaro uyarike danu dubo barukeka wau ma worome mune sianike Yesubairo sabu ane fari.

<sup>51</sup> Fariro Yesuma dawabake eno wei, abake aneme umane weaku wei? Eno weiro i naisa kikori sini mima wei, Dai Mi, na naisa ere dakakuneba ibake emane weakunea wei.

<sup>52</sup> Eno weiro Yesuma ma owerike nono wei, ania, anu imukeka imukae daiwera ibake wirokinua weiro naisa foraike erike Yesunu umuro ani.

## 11

*Yesu Kini ari sinike Derusaremu goiro fari wake*

<sup>1-2</sup> Derusaremu goiro aarebe Bedifeidaini Bedeni goiro aare faka. I goiyai oraara ibi Oriwa udiro aare fakaro Yesuma Danu iwoka ukekà orou moi miyai we odaifiane ukaada eno wei, aniawake goi araweko udiro uwara kubunero okoa doniki weaisa abu doise oisaro ibinuba efuaisiie ma worome muawake waure aarawa eno wei. I doniki duboro moi orou yaure me wei.

<sup>3</sup> Yesuma eno weike nono wei, moi orouma eno wefeisa, ainama wenuro i doniki ma woromaisi wefeisaie, eno yama weawa wei, uwanu Dai Waria Mima mufune wenua weawaro mafia wei.

<sup>4</sup> Eno weiro anisike okoa doniki ekibaie i doniki goi ebamoko uwararo uwane oisaro enare ibiro ekike ma woromeibisi.

<sup>5</sup> Ma woromeibisiro i goi orouma eno weisa, aneme ukaisi weisa. Eno weisake weisa, aneme-bake i doniki ma woromaisi weisa?

<sup>6</sup> Eno weisabaie emuama weisi, Yesuma wenuro ma woromaisua weisiba ibake mariekaro doniki mune waukike Yesubairo anisi.

<sup>7</sup> Waure aare fakike emenu dubo barukeka wau kukune i doniki duboro yaweke oisiro Yesu i doniki duboro amuke yauri.

<sup>8-9</sup> Amuke yauriro eme keuwere emenu wauini farai kakabaini daabaro yaweke ode aneibisaro Yesu ubarero i dubo duboro aneibiro bokai orouini dubuena orouini emuama rooro dai-were ukaada ousana weada eno weisa, iyanu Dai Waria Mi yewado farinua weisa, Danu dai Godinu ibiroma farinu Mi idua irauaiaiweisa. Godima Dawabake irauaiai ukeibakua weisa.

<sup>10</sup> Iyanu dai sirorari mi Deiwidinu yawokeibi odo i ari moi awoena yawokeka odo we dawama ma irauaiai ukaada ibifekua weisa. Eno weisake

nono weisa, iyanu urero Dai Mi, daiwereroma  
weisake eno mane ukeibisaro Yesu fare ani.

<sup>11</sup> Fare anike Derusaremu goiro ane farike i  
Derusaremu dai sosi uwara ubarenaro amui.  
Amuike ereibiro dumudumu sinibake Dawaini  
Danu eme yaisina dueroini (12) emuama  
Derusaremu goi meisake Bedeni goiro owere  
anisa.

### *Yesuma i boruba anabake diwari uri wake*

<sup>12</sup> Wai awanakuro i Bedeni goi meisake aneebe  
Yesu desini uri.

<sup>13-14</sup> Yesu desini uriro boruba ana roro erike  
boruba kai mune ifine ani. Ane farike eribaie  
kai uwane me furobake kakabai maneba ibake  
eraada eno wei, anu kai moi orou da iseifisane  
weakune weiro Danu iwoka ukeka orou nauisa.

### *Yesuma dai sosi ubarenaro ani wake*

<sup>15</sup> Derusaremu goiro aare fakake Yesuma i dai  
sosi uwara ubarenaro amuke ani. Amuike oi  
make mune ukeibisa orouini oi muneka orouini  
yaisina yoweriro isakaro emenu oi moko make  
muneka seboini ofereni odeka ubari adaini mune  
makeka orounu yaureka seboini mune sianiro  
ubere aine ibisa.

<sup>16-17</sup> Eno uike i fefenaro erabusa waureka  
orou da anifisane enare kuurike wei, Godinu  
bukaroma eno weaku, Nanu uwara dawa eme  
yaisinanu guriguri ukeka uwaraya wei. Godinu  
bukaroma eno weakuba me wei? Eno weike  
nono wei, yama waira ukeka orounu uwara ubu  
ukisaya wei.

<sup>18</sup> Eno weiro i dai ofereni ode sibore sianeka  
orouini i Mosesinu darawadu we ma iwoka  
ukeibisa orouini i Yesu wei wake nauisake Yesu

Maki 11:19

li

Maki 11:27-28

ma feareka daaba yodia ukaada Yesu Danu wei  
wakebake ia sika.

<sup>19</sup> Dumudumu siniro Yesuini Danu waiya ukek  
orou i goi ido meisake owere anisa.

*I boruba anabake nono we ma iwoka ui wake*

<sup>20-21</sup> Wai awanakuro daabaro fakake anaada  
ekabaie ena boruba ana yaisina boma urike ibiro  
Fidama erike eno wei, Dai Waria Mi, Ama boruba  
anabake wake weiro boma urinua ea wei.

<sup>22-23</sup> Fidama eno weiro, Yesuma wei, Nanu ba  
wake wemaro nauawe weike wei, Godi imukenewaa  
iawewe. Aina mima i oraarabake eno wefekui  
uyake dawara ubarenaro isaa, eno wefukukema  
nono Babae Godi imukenewaa ufekui enaenari  
ufekua wei.

<sup>24</sup> Eno weike nono wei, aneaneme we nauke er-  
aada guriguri ufoisake Babae Godi imukenewaa  
ufoisai enaenari mafiakuro mufoisaya wei.

<sup>25</sup> Ya dawa enare ibaada guriguri ufoisai  
moi mima yabake merama ukeka sineka uibai  
imukada imuke medifoisai nono yanu urero  
ibinu Babaema yanu merama ukeka sineka mune  
imuke medifekua wei.

<sup>26</sup> Yanu naiyemukunu merama ukeka sineka da  
mune imuke medifoisai nono yanu urero ibinu  
Babaema yanu merama ukeka sineka da mune  
imuke medifekua wei.

*Yesunu bunabake we nauke ereka wake*

<sup>27-28</sup> Derusaremu goiro nono anisake dai  
sosi uwara udiro enereibisabaie dai ofereni  
ode sibore sianeka orouini nono i Mosesinu  
darawadu we ma iwoka ukeibisa orouini dai sosi  
yawokeibisa orouini eme keuwere Dawabairo  
fakake eno weisa, Anu bunaroma eno ukaku

weisa? Ainama i ari eno buna maiairo ariena  
eme i dai sosi uwara ubarenaroma yowerie  
weisa.

<sup>29</sup> Eno weisaro Yesuma emuabairo ma owerike eno wei, Nanu yabairo we nauke erekake wake wemaro nabairo irauaiai moko weforo naumaukema ainanu bunaroma ukakune ibai wemauro naufoisaya wei.

<sup>30</sup> Eno weike nono wei, Dioninu babadaido ukeka Godima weiro ukeibiba emema weisaro ukeibi weawero nauma wei.

<sup>31</sup> Yesuma eno weiro wake we makakake eno weisa, aneme wefeisi weisa, Godibairoma faria wefeisiie nono anemebaké Dioninu weibi wake imuke da uisa wefekua weisa.

<sup>32-33</sup> O emebairoma faria wefeisiie i orou yaisina emuama iyabake dino ufeisa ibake aneaneme weifeisi arie weisa? I orou yaisina imuisa, Dioni dawa Godinu we bou ukeka mi imuisaba ibake ia sinaada eno weaisa, Dioninu babadaido ukeka aboroma fari ibai iya iwoka meya weibisaro Yesuma ma owerike emuabake eno wei, Ainanu bunaro ukakune ibai da wemauro ya da naufoisaya eno wei.

## 12

*I gureifi kai waiya yawokeibisa merama oroubairo dubo waure wei wake*

<sup>1</sup> Yesuma moi wake dubo waure weike eno wei, yewa wakeye Danu onamibake emuabairo eno wei, moi mi gureifi waiya umanike diru kuurike omama oro mame kara uike gureifi yobai wawi. Eno uike danu waiya moi orouma yawofisane marieke moi orofaro ani.

<sup>2</sup> Nono dubena ayo ureka oya fariro danu waiya ukeka mi danu gureifi kai mufine we odairo ani.

<sup>3</sup> Ane fariro i waiya yawokeibisa orouma i mi mukake usima ureebe gureifi kai make da uisake ma owekake we odaisaro ani.

<sup>4</sup> Aniro nono moi mi we odairo ani. Ane fariro bokairo mukake ureebe nono ma owere odaisaro ani.

<sup>5</sup> Ane fariro nono moi mi deri we odairo ani. Anike ane fariro mukake ukaro feari. Nono dubuena eme keuwere emua deri we odaiseibiro aneibisaro moibai usima ureibiriekake moibai ma feareibisa.

<sup>6</sup> Eno mane ukebisaro eme moi mebake imukama imui, Nanu amara ubi we odaimaro dawabake iifa ufeisaya we imuike we odairo ani.

<sup>7-8</sup> Ane fariro emenu emenu we makakake eno weisa, yewae danu amara ubiba ufeiske danu waiya mufeisia weisake munaadae ukake mune oro derena enaro siaka.

<sup>9</sup> Eno ukaba ibake i waiya onami mima aneme ufeku wei? I waiya onami mima anifekuke i waiya yawokaisa orou ma feafiauke danu waiya imusu oroubairo mafiakua wei.

<sup>10</sup> Godinu bukaro i wake kakuraisaba me? Na iwoka, ya kakuraisa. I Godinu bukaroma eno weaku,

i uwara ma enarada mune siaka omama i bokai kukubu kora kai ari sini.

<sup>11</sup> Yewae iyanu Godinu ukekabake kawama eraisia,  
eno weakua wei.

<sup>12</sup> Yesuma i dubo waure wei wake emuabairo eno weibiba ibake Dawai iyabairo eno weakua we imuisake Dawa ma feafisane daaba yodia

Maki 12:13-14

liv

Maki 12:18-19

ukaada nono emuae i moi oroubake ia iyarada  
meisake mede anisa.

*I dakesi oi odekabake we nauke erekawake*

<sup>13-14</sup> Moi orouma Ferosi orouini Erodi orouini  
emuama Yesu we iruke efisake mufisane wake  
weisake i orou we odairiekaro Yesubairo ane  
fakake eno weisa, Dai Waria Mi, A dawa meo me  
miya ba mi ibai iya iwoka ukaisia weisa. Eme  
yaisinabake emuae demuiya eno we imukaku.  
Eme moi daiwerero nono moibai okoanakua eno  
we imuke dakakua weisa. Eno weisake nono  
weisa, Ama Godinu wake we ma iwoka ukenewaa  
ukeibakuro ibai iya iwoka sinaisia weisa.

<sup>15</sup> Ibake i Romani dai gaemani mi Kisabake  
dakesi oi mafeisiba me weisa? Eno weis-  
aro emuama Dawa irukeka imuka imuisa ibai  
Dawa iwoka uiba ibake eno wei, anemebake we  
irukaisa wei? I siriwa oi makowero ema weiro  
maisa.

<sup>16</sup> Maisaro i oi inana eraada wei, ainanu ibo  
naisaini owaowaini ewado ibinu wei? Eno weiro  
emuamae Kisanua weisa.

<sup>17</sup> Eno weisaro Yesuma ma owerike eno wei,  
Kisanu aneme aneme dawabake ma owere  
maeweke nono Godinu aneme aneme Godibake  
ma owere maewe weiro i wake kawama Yesuma  
idua eno weiro nauisa.

*I fearekaroma uyarekabake we nauke erekawake*

<sup>18-19</sup> Dubuenaro moi Sadusi orouma Yesubairo  
faka. I orouma eno imukada eno weisa, moi  
orou feafeaisake da uyafeisaya eno weada we ma  
iwoka uke enereibisa. I orouma Yesubairo aare  
fakake we iruke eraada eno weisa, Dai Waria  
Mi, Mosesima eno weia weisa, moi mima aweka  
mufekuke aruma amara mune da ukekuke me

ibeebe feafeku. Feafekuro danu nabuema danu kakanu aweka wabu mufekuke nono i feafeku mibake aruma amara dore mufekua eno owaowa uke odike weia weisa.

<sup>20</sup> Eno weisake nono weisa, demui aidakaku seweni (7) ibeebe bokai mi feari.

<sup>21</sup> Feariro nono danu abana nabuema danu kakanu aweka wabu munike amara aruma dore mero me ibeebe feari.

<sup>22</sup> Feariro danu moi abana nabuema munike amara aruma dore mero me ibeebe feari. Feariro eno mane i eme sewenima i aweka munaada amara aruma dore mero feare me sikaro nono i awekaini dubenama feari.

<sup>23</sup> Enorama dubuenaro i feareroma uyareka odoro abo mima i aweka mufeku weisa? I eme yaisina seweni mukaba abo mima mufeku weisa?

<sup>24</sup> Eno weisaro Yesuma wei, Godinu bukaro wakeini Danu bunaini ya iwoka meba ibake imuke dakaisake ma nuna ukaisaya eno wei.

<sup>25</sup> Yesuma eno weike nono wei, i urero ibinisera aneru emua aweka mune dakaisa enaenari eme yaisina feafeisake nono uyafeisaie aweka amara da ufeisaya eno wei.

<sup>26</sup> Feareka orounu uyareka ibai Mosesinu bukaro kakuraisaba me wei? Eno weike nono wei, i yareibaku ananu i wake ya kakuraisaba me wei. Nono weike wei, I wakero Godima Mosesibake eno wei, Nae Eibaramuini Aisikini Deikabuini emenu Godiya wei. Godi Dawae i feareka orounu Godi meya eno weike wei, i orou feakakema awoena urero ibinisaya wei.

<sup>27</sup> Eno weike wei, Dawae i wirokekka orounu Godi ibake ya ma nuna ukaisaya Yesuma eno wei.

*Godinu dai darawadu wake*

**28** Emuama wake wake we makaneibisabiae moi Mosesinu darawadu we ma iwoka ukeibi mima farike Yesu Danu irau wake naukebe imuike Yesubake eno wei, abodei darawaduma daiwera wei?

**29** Eno weiro Yesuma ma owerike eno wei, i dai darawadue enoya wei, ya Isaraera orou, nauawe, yanu dai Godi Dawa demui maneya wei.

**30** Yanu Dai Godibairo yanu awararoma imukekaini yaisina yanu imumuini imukama imukekaini yanu bunaini yaisina Godibairo odaada imukari uawe wei.

**31** Yesuma eno weike nono wei, moi darawadu i ari enoya wei, yanu naiyemukubake yanu onarou ari imukari ukeibiawei. Eno weike nono wei, moi dai darawadu meya wei.

**32** Eno weiro i mima eno wei, ba weakua wei, Dawa demui Godi manero moi meya wei.

**33** I mima nono wei, Godibake imukari ukenewaa ufeke imukenewaa ufeke ukenewaa ufeke iyanu naiyemukubake iyanu onarou ari imukari ukenewaa ufeisiie irauaiai eno wei. Eno weike nono wei, ofereni ofekaini ofereni yarekaini irauaiai meya wei.

**34** Eno weiro danu wake irauaiai weibibake Yesuma wei, Godinu yawokaku daaba ubiubi anifane ukakua wei. Yesuma eno weiro nono moi wake we nauke ereka we ere dauisa.

### *Emenu Godima we mune odi mibake we nauke ereka wake*

**35** Dai sosi uwara ubarenaro Yesuma we ma iwoka ukaada eno wei, i Mosesinu darawadu we ma iwoka ukaisa orouma eno weaisa, i Kerisoe Deiwidinu sirorari miya anemebake eno weaisa wei?

**36** Eno weike nono wei, I Kerisoe Deiwidinu sisia mi mane meya Dawae danu Dai Waria Mi. Godinu Imumu Irauma Deiwidibairo ma iwoka uiba Deiwidima eno wei, Godima Nanu Dai Waria Mibake eno wei, Nanu ba ena wana enaro yauaro aini wasai ukaisa oroubake buna umake Anu umu wowonaro odimia weiro Deiwidima eno wei.

**37** Deiwidima i Kerisobake Nanu Dai Waria Mi weibairo nono aaneaneme Keriso Dawa Deiwidinu sirorari mi sini wei?

*Yesuma i darawadu we ma iwoka ukeibisa oroubake eme yaisina we ma iifa urie wake*

**38-39** Yesuma eno weiro i orou yaisina Danu wake naukenewaa uisaro we ma iwoka ukaada eno wei, eforo moi Mosesinu darawadu we ma iwoka ukaisa orou emema emenu ibi we ma daiwera ufiakaro naufisane ibake yafa wauma barufeisake i makedi orofaro enaraisa orouma a farinu wefisaro naufisake nono i Du orounu sosi uwara ubarenaro irau yaureka orofaro aweawe yaufisake banau uruna ifisane ibake enaenari ukebisaya wei.

**40** Eno weike nono wei, i orou emenu ararae eno mane ukaada nono emenu guriguri yafawere ukebisaro moi orouma naufisane ibake eno wefisakema nono i wabu awekabonu eraerabusaini uwairaini yaisina waira ukebisaya Yesuma eno weike nono wei, dubuenaro Godima emua fanisi daiwera mafiakua eno wei.

*I wabu awekanu ofereni odeka wake*

**41-44** Dubuenaro dai sosinu me makeka oi bogesi ubiubi yaure ibaada ereibiro eme keuwere emenu oi fare odeibisa. Moi erabusa keuwere

orou keuwere odeibisaro nono dubuenaro erabusa keu me wabu awekama farike danu koro-feni oi kai raaranaku bogesiro odiro Yesuma eraada danu iwoka ukeka oroubairo weiro fakaro wei, Nanu wake nauwe wei, Yewa wabu aweka danu uruna make muneka oi yaisina odinu ibake danu oi daiwerefere odinua wei. Yesuma eno weike nono wei, eraerabusa keuwere orou oi daiwerefere oisaro emuabairo keuwere ibinisaba ibake okoananaku oisaya wei. Nono i wabu aweka dawabairo ibinu oi yaisina idua odinua eno wei.

## 13

*Yesuma i dai sosi uwara ma merama ufeisa wake wei*

<sup>1</sup> Yesuma i dai sosi medike isareibiro moi iwoka ukeka mima eno wei, Dai Mi, oma daibaima uisa uwarawerewere ea wei.

<sup>2</sup> Eno weiro Yesuma ma owerike eno wei, i dai uwarawerewere eraku wei? I oma yaisina ubefisaro moi omama moi oma duboro da ibifelekua eno wei.

*Meramaini oferi daiwerebake wei wake*

<sup>3-5</sup> Dubuenaro Yesuma i Oriwa oraara okoro yaure ibaada dai sosi ereibiro Fidaini Deimisini Dionini Enuduruuni emenu mane Dawabairo fakake eno weisa, Anu wenu enaenari abonodo ufeku weisa? I dubuena kai odo aneme aneme ufeku ufeisirofafa weisa? Eno weisaro Yesuma ma owerike emuabake eno wei, erenewaa uforo wei.

<sup>6</sup> Eme keuwere we irufisane nanu ibiro fafeisake eno wefeisa, na dawa Keriso, na dawa Keriso eno mane we irufeisake wefeisaro eme

keuwere naufeisake emenu umuro anifeisaya eno wei.

<sup>7</sup> Yesuma eno weike nono wei, ubiubi uraneka wake yama naufoke nono yafawere uraneka wake naufoisae ia da siforo wei. Eno mane ufekuro ibai me sifekuie nono i dubuena kai odo idua fafekua wei.

<sup>8</sup> I orofa akaka imusu imusu uranefeisaro moi orofa gaemanini moi orofa gaemani uraneifeisaro moi oroorofaro doo amani amani ufekuro akaka keuwere arumu daiwere yaufeisake eno mane ufeisaro i merama dubuena kai odo idua fafekua wei.

<sup>9</sup> Enoya ibai erenewaa uwae wei. Ya waufiakaisake moi kanisoro oroubairo waure ane odifiakaisa. Eno ufeisake nono i Du orounu sosi uwara ubarenaro waure ane odifiakaisake usima ufiakaisake gaemani orouini kini oroubairo waure ane odifiakaisake Nabake ya eno ufiakaisaro yama Nanu ukeibisara wake emuabairo wefoisaro iwoka sifeisaya eno wei.

<sup>10</sup> Yesuma eno weike nono wei, Godinu irau wake i orofa akaka orou yaisinabairo bokai iro we eneifeisaro dubuenaro i me sifeku odo ido fafekua wei.

<sup>11</sup> I orouma merama ukeka eraerabusa fafeku odoro aare ya mufiakaisake waure anifiakaisaro yanu wefoisa wake aneme aneme wefoisa i ari eno da imuforo wei.

<sup>12</sup> Godima yabairo mafiaku wakema wefoisa wei. Yama i wake da wefoisaro Godinu Imumu Irauma yabake wake wefeku wei. I odoro kakama nono danu nabuebake do mafekuro ma feafeisaro babaema danu amarabake enaenari ufekuro amara aruma emenu amaeini babaeini emuabake wayai wefeisaro ma feafiakaisaya eno

wei.

<sup>13</sup> Eno weike nono wei, ya Nanu ibi mu-naisabake i orou yaisina yabake imuka ka ufi-akaisaya wei. Ainama awoenaroma enare ara ukeifekuro i buna dubuena kai odoro dawa wi-ro-fekua Yesuma eno wei.

*I ba me meramawere eraerabusa fafine ukaku wake*

<sup>14</sup> I meramawere erabusa dawae i dai sos-inu iiifa ooruro ibifeuke i yaisina ma merama ufekuie ya kakuraisa orouma i ufeku ubunu ubiye iwoka sifoisake i dubuena kai odo idua fafine ukinua wefoisaya wei. Eno ufekuie Diudia orofaro ibinisa orou oraararo sabu amuke anifeisaya wei.

<sup>15</sup> Uwara seboro yaure ibifeisa orou uwara ubarenaro emenu erabusa mufisane da anifeisaya wei.

<sup>16</sup> Eno weike wei, waiya ukeifeisa orou da owejisake wau mufisane da anifeisa.

<sup>17</sup> I odoro boana bobo awekaboini ama iseifeisa amara aruma bobo awekabo emenu anifeisa daabae meramawereya wei.

<sup>18</sup> Eno weike nono wei, guriguri uaweke i merama odo, obi daiwere mafeku odoro da fafeku weawe wei.

<sup>19</sup> I odo keuwere fafeisaro merama daiwere ufeisaya wei. Adinami nauwaro Godima i orofa akaka ubu ui i furoma eno me, awoena eno ere dakaisi, nono dubuenaro da efeisia wei.

<sup>20</sup> Eno weike nono wei, Godima i meramawere odo keuwere ma fu da ufironae eme yaisina feafisanea wei. Nono Dawa Danu we mune odirie oroubake imukada ibake odo keuwere ma funaku uia wei.

**21** Moi mima yabake we irufekuke eno wefeku, Keriso Dawai ewadoba iro aria iro eawe eno wefekue danu wake da nauforo wei.

**22** I we irukeka Kerisoini we irukeka we bou ukekua orouini keuwere fafeisake buna ukekaini buna erekaini daiwera ufeisaro emenu ufeisabai efeisa. Eno ufeisake Godinu we mune odirie eme moi we irufiakane eno ufeisaya wei.

**23** Yewa wake yaisina yabake weakuneba naukenewaa uforo eno wei.

### *I Ba Eme Sini Minu fafeku odobake wei wake*

**24-25** I merama odo odo me sifekuke eweka dumu sifekuro manabe edoro da ufkuro muina ureroma isare aafeisaro urenu bunawere yaisina amani ufeisaya wei.

**26** Eno weike nono wei, eno ufeisaro I Ba Eme Sini Mi ou ubarenaroma Danu bunaini edoro daiwera ido fafekuro eme yaisina efeisaya wei.

**27** Dawa Danu aneru we odaifekuro anifeiske i eweka amukaku enaroma eweka isaraku enaroma ure baruna doo baruna iroma aboro aboro Danu we mune odirie orou yaisina mufeisaya wei.

### *I boruba anabake we ma iwoka ui wake*

**28** Yesuma Danu iwoka ukekua oroubake eno wei, I boruba anaro eaweke imuawe wei. Boruba ana awoena kua ido fafiro ya iwoka i obi isareka eweka ido farinu wefeisa wei.

**29** I ari eno yewa yaisina eno ufkuro efoisake iwoka ufoisaya wei.

**30** I Ba Eme Sini Mi Dawa fafine aisamero enare ibinua Nanu wake ba wemaro nauawe wei. Yewa ibinisa eme yaisina da feare me sifoisaro ibai yaisina bokai ufkuro efoisaya wei.

**31** Ureini doo me sifekuro nono Nanu wake da me sifekua wei.

**32-33** I fafeku odo eme iwoka me, urero ibinisa aneruini iwoka me, Godinu amara Yesu Dawaini iwoka me, Godi Dawa mane iwoka uke ibinua wei. I dai Minu fareka odo wai ureifikuro fafeku o dumudumunaku sifekuro fafeku odo ya iwoka mebake naukenewaa ufoke erenewaa uforo wei.

**34** Yewae i ari eno, moi mi moi orofaro anifine ukaada danu waiya ukeka oroubairo emenu waiya demui demui marieke danu dai yawokeka mibake eno wei, irauaiai yawokeifao wei.

**35-37** Enaenari yabake weakuneba i Dai Minu fafeku odo ya iwoka meya wei. Dawa dumudumu o dumu abanaro o wai awaro o wairo ido fafekuke nauka aine ibifoisaro enao ufiakuba ibake yaini eme yaisinabake irauaiai koro ukenewaa ufone weakunea wei.

## 14

*Dai orouma Yesu ma feafisane weisaro moibaima we kuuka wake*

**1-2** I Godima i Isaraera orou Idifiroma waure anisa banau urunaini ure wawareka iraa yisidi ode me buredi uruna iseka odo raarayai fafekuro iseifeisaba ibake i dai ofereni ode sibore sianeka orouini nono i Mosesinu darawadu we ma iwoka ukeibisa orouini emuama Yesu fema mufisake ma feafisane daaba yodia uisakema nono iroma meisake eno weisa, banau odoro da wanaro mufeisi weisa. Eme yaisina emenu mane dino ufeisake iyaini uranao ufeisaba medifeisia eno weisa.

*Moi awekama Yesu Bedeni goiro irauaiai urumu aduama kare odi wake*

<sup>3</sup> Yesuma Bedeni goiro ibaada i beko mame ibiro Yesuma ma wiroi mi danu ibiye Saimoni danu uwara ubarenaro amuike yaure ibaada uruna iseibibaie moi aweka i irauaiai adua omama ubu uisa kawaburo waure amuke farike i kawabu minoo ma doro yarike Yesunu iiriro ma oini.

<sup>4</sup> Eno uiro i yaure ibisa moi orouma dino uisake dino wakeroma eno weisa, anemebake me sara ma oininu weisa.

<sup>5-6</sup> Eno weisake nono weisa, I adua make mune dedi kina (K30) muneroma erabusa me oroubake make dakinuke eno anemebake ukinu weisa? Eno weisake i awekabake dino daiwera uisaro Yesuma eno wei, mediaweke i awekabake dino wake da we makaewe weike wei, dawae Nabake irauaiai ukinua wei.

<sup>7</sup> Yesuma eno weike nono wei, eraerabusa me orou yabairo aine wai ure ibeibaisade yanu arara emua unu kofiakane wefode unu kofoe weike nono wei, Na dawa yabairo aine wai ure da ibimaua wei.

<sup>8</sup> Dawa Nanu ofero irauaiai urumu adua ma oininu ibake Nanu ooru ukeka uke bou ukinua wei.

<sup>9</sup> Yesuma eno weike wei, nanu wake wemaro nauawe wei, Godinu irauaiai wake doo baruna ure baruna iro yaisina we enaada i aweka danu ukinu ibai imukeifeisaya Yesuma eno wei.

*Diudiasima Yesu wayai wefine wei wake*

<sup>10-11</sup> Diudiasi Ikariada dawae Yesunu moi duwero (12) iwoka ukeka mi dawama moi dai ofereni ode sibore sianeka oroubairo aya odifine

fare anike weiro naukake rooro daiwere uisake  
oi daiwere mafisane weisa. Eno weisaro Diudiasi  
Ikariadama Yesu we sibofiro mufisane daaba  
yodia ukeibi.

*Yesu i Idifiroma waure aneka banau uruna  
Yesuini Danu iwoka ukeka orouini isa wake*

<sup>12</sup> Ure wawareka iraa yisidi ode da uisa uruna  
danu kawama odo ido fariro Godima Isaraera  
orou Idifiroma waure aneka mamoenakubai i ba-  
nau ufisane ureibisa. Danu iwoka ukeka orouma  
eno weisa, Anu banau aboro uke bou ufeisike  
ifeisi weisa?

<sup>13</sup> Eno weisaro Yesuma Danu iwoka ukeka  
miyai we odaisada eno wei, yeka goiro aniawake  
moi adua koraku mi eawake danu umuro aniawa  
wei.

<sup>14-15</sup> Aniawake danu uwararo faawake i uwara  
yawokaku mibairo eno weawa wei, uwanu Dai  
mini Danu iwoka ukeka orouini emua aboro  
banau ifisane wenu weawaro i mima yabake dai  
uwara moi ena baruna ooru mafia wei.

<sup>16</sup> I uwararo uruna mune uke bou ukeibiawa  
wei. Yesuma eno weike we odairiero i goiro  
anisike Yesu Danu wei enaenari weisiro uwara  
ooru mairo uruna uke bou ukeibisi.

<sup>17-18</sup> Dumudumu siniro Yesu Dawaini Danu  
iwoka ukeka orou duweroini (12) emuama i  
uwara ubarenaro amuke fare yaukake i uruna  
isaada Yesuma eno wei, moi uruna isaku mima  
na we sibofekuro mune ane korosiro ufokaisaya  
wei.

<sup>19-20</sup> Yesuma eno weiro Danu iwoka ukeka  
orou emenu imuka merama imukada eno weisa,  
naba ainadei ari eno yaisina weada we nauke  
ereibisaro eno weisaro Yesuma wei, moi duwero  
(12) iwoka ukeka mi naberoro dawaini demuiro

uruna munaisua wei. I munaku mima Na we sibofarakua wei.

<sup>21</sup> Godinu bukaroma eno weakua wei. I Ba Eme Sini Mi Dawae enaenari feafekua wei. Enoba i Ba Eme Sini mi we sibofaraku mi danu merama ukeka sinekiae daiwera. Enoba danu amaema dawa da dofironae irauaiai ya eno wei.

*Babaenu ofeini iwaini iseka odobake wei wake*

<sup>22</sup> Yesuini Danu iwoka ukeka orouini uruna isa. Uruna isaada Yesuma buredi munike Godi irauaiai we imukada guriguri ui ke ma birabira yarieke Danu iwoka ukeka oroubairo makada eno wei, yewae Nanu ofeya muaweke iawe wei.

<sup>23-24</sup> Nono i fanigini munike mame ibaada Godibairo we ma irauaiai ukaada guriguri ui ke mairo i orou yaisina iseibisaro Dawama eawe wei, yewae Nanu awoena arararo uke makaneka iwa eme keuwerebake isafeikua wei.

<sup>25</sup> Nanu wake wemaro nauawe wei, yewa naadidi kai iduda idua yaini demuiro imauke nono da ise ibeimauke dubuenaro Godinu yawokeibaku orofaro yewa naa didi kai iduda nono demuiro ifeisia wei.

<sup>26</sup> Eno weiro yaura kairoma Godibake we ma irauaiai ukaada weisake Oriwa oraararo amuke anisa.

*Fidama Yesu Dawa iwoka me wefekubai we bou ui wake*

<sup>27</sup> Oriwa oraararo amuke aneebe amuke faka. Amuke fakake Yesuma eno wei, ya yaisina Nabake maru ufoisake Na medifoisaba ibake Godinu bukaroo eno weakua wei, I mamoe abu yawokeka mi Nama umauro i mamoe abu yaisina

daaba imusu imusuro anifeisaya eno weakua wei.

<sup>28</sup> Nono dubuenaro fearekaroma Na ma uya-farakuro Nako Gareri orofaro animauro ya yaisina aimo iro fafoisaya wei.

<sup>29</sup> Eno weiro Fidama ma owerike eno wei, i orou yaisina A maru ufeisake A medimekaisaro nono na maru da umauke A da medimauanea wei.

<sup>30</sup> Fidama eno weiro Yesuma nono wei, a naua wei, eweira dumuro kawama kokoroko wefekuiie ako Nanu ibi buuba we ma fe yaraada meo wefakua wei. Yesuma eno weiro Fidama bunaw-ereroma nono wei, Aini Naini feafukuba Abake meo da wemaua wei.

<sup>31</sup> Fidama eno weiro Yesunu iwoka ukeka orou yaisina enaenari weibisa.

### *Yesu Gesemani waiyaro guriguri ukeibi wake*

<sup>32</sup> Gesemani orofaro fakabaie Yesuma Danu iwoka ukeka oroubairo wei, yauawero Na guriguri uma wei.

<sup>33-34</sup> Eno weike Fidaini Deimisini Dionini emua we waure anike Danu imukari daiwera ukaada eno wei, Nanu imuka inimubi ukakuba Na feareka imuka imukakunea wei. Yewado yaure ibaada koro ukeibiawe wei.

<sup>35</sup> Eno weike yafa me funaku eka anike dooro iboo yanakaisari uike guriguri ukaada eno wei, yewa merama ure yanakewere Nabairoma mu-fane ufakuie mua wei.

<sup>36</sup> Eno weike nono wei, Nanu Babae, Anu arara yaisina ufane weakunea wei. Yewa merama Na ure yanakewere Nabairoma anifine wefakuiie anifekua wei. Nono Nanu arara da uake Anu arara mane ua wei.

**37** Eno weike owerike fare eribaie Danu iwoka ukeka orou nauka aine ibisaba Fidabairo eno wei, a nauka ainaku ari wei? Wai funaku yawokakuba me wei?

**38** Yawokenewaa uaweke guriguri uawe wei. Merama uke erekab yabairo fanao ukekua wei. Yanu imukanu arara ufoisaie nono yanu ofeye buna meba ibake eno da ufoisaya wei.

**39-40** Yesuma eno weike nono anike Danu adina wei wake enaenari weada guriguri uike owerike fare eriebaie nono nauka aisaro emenu naisa nauka ariari uiba ibake moko wake we dauisa.

**41** Eno uisaro anike nono owere farike eno wei, nauka ainibada ko yaraisa wei? Iduaya uyaewe wei. I eweka funaku sininuba i Ba Eme Sini Mi meramawere orounu wanaro mame odifeisaya wei.

**42** Uyaewero anife wei. Na we sibofari mi idua farinua eawe wei.

### *Yesu yabakake anikafu oisa wake*

**43** Yesuma eno weibibaie Diudiasi moi duero (12) iwoka ukeka mini nono moi eme keuwere bauini goreini waukake faka. I dai ofereni odeka orouini Du orounu bisara orouini emuama we odaisaba ibake faka.

**44** Diudiasima i Yesunu wanaro mufisane aaka oroubake eno wei, ereiforo animake abo mi yabamauke oo umauie ido fare sabu mufoke aniforo wei.

**45-46** Eno weike i orofaro ane faraada Yesubairo eno wei, Dai Sisa Mi weike oo ukeibiro i Diudiasini aaka orouma Yesu fare yabaisa.

**47** Yabakeibisaro Yesunu moi iwoka ukeka mima danu bau munike i dai ofereni ode sibore

sianeka minu waiya ukeka mi danu ome umane kasini.

**48-49** Yesuma i oroubake eno wei, anemebake Na waira ukeka mi ari bauini omaini ure yanake ufone farisa wei? I dai sosiro odo keuwere we ma iwoka ukeibisara i furo mune da uyakakema nono awoena bauini usini anemebake mune farisa wei? Eno weike wei, Godinu bukaroma eno weakuba ibake enaenari ukaisaya wei.

**50** Yesuma eno weiro Danu iwoka ukeka orou yaisina Yesu meisake ia iyare flake anisa.

**51-52** Nono Yesunu moi iwoka ukeka mima enare ibaada wau mane baruike ibiro i orouma dawa ujisane yabaisaro wau mane ma kukune mukaro ofe mane ia sinike durame ani.

### *Yesu i kanisoro orounu ibooro enare ibi wake*

**53** I orou Yesu wanaro mamisake dai ofereni ode sibore sianeka minu uwarraro waure ane fakaro i ofereni ode sibore sianeka orouini Du orounu bisara orouini Mosesinu darawadu we ma iwoka ukeibisa orouini emuama ku siane ibisaro ane faka.

**54** Ane fakaro Fidama yafawereroma eroke eroke emenu umuro ane dai ofereni ode sibore sianeka minu uwara udiro ane farike yaure ibi. Dawaini nono moi waiya ukeka orouini inaa rarakada inaa udiro yaure ibisa.

**55** Yaure ibisaro I ofereni ode sibore sianeka orouini kanisoro orouini yaisina Yesu meo wayai weifisake Yesu ma feafisane daaba yodia uisake daaba fou ure dauisa.

**56** Ibake moi orouma uyarada meo wake weibisa ibake emenu imukekae demuiro ode dauisa.

**57-58** Nono moi orouma uyakake meo wake weisake eno weisa, yewa mima eno weia weisa, emema uisa dai sosi uwara ma doroo yamauke odo buuba me sifekuro nono awoena uwara wanama da umauke me ma enamaua eno weia weisa.

**59-60** Moibaima eno weisaro nono moibaima imusu wake weisaro i dai ofereni ode sibore sianeka mi danu yaure ibi orofaroma uyarada Yesubake eno wei, i orounu weaisa wake naukinu wei? I dai ofereni ode sibore sianeka mima Yesubake nono wei, anemebake moko wake we dauke ibinu weike wei, ama aneme aneme we-faku wei?

**61** Eno weibaie Yesu wake we da uiro dai ofereni ode sibore sianeka mima nono wei, Ae Godinu Amara Kerisoba me wei?

**62** Eno weibaie Yesuma euwa wei. Eno weike wei, I Ba Eme Sini Mi i buna daiwere Godinu baena wana enaro yaufekuke nono iroma ou mameifeku irofafekuro efoisaya wei.

**63** Dawama eno weiba ibake i dai ofereni ode sibore sianeka mi danu wau ma girsada eno wei, moi wayai weeka orounu wake da naufeisi wei.

**64** Danu meo wake naukaisiba nono moi wayai wake da wefeisaya wei? Eno weiro i wake daaba demuiro weisa, Danu Godibairo wake merama wenuba Dawa ma feafeisia weisa.

**65** Eno weisaro moi orouma Dawa wisiomu ukeibisake Danu naisa wauma dadau uke oisake wanama uraada eno weibisa, ainama A urakuyainu? Wearo naufe weibisa. Weada eno ukeibisaro meremere orouma Yesu mukake wanama ureibisa.

*Fidama Yesunu ibi we fe odaada meo wei wake*

**66-67** Fidama i dai ofereni ode sibore sianeka minu uwara udiro yaure ibi. Idua yaure ibiro dai ofereni ode sibore sianeka minu moi waiya ukeibi arumama fare aneebe Fida inaa udiro yaure ibiro dawa eraada dawama eno wei, a dawa i Nasaredi goi mi Yesubairo ibia wei.

**68** I arumama eno weibaie Fidama ma owerike eno wei, na meya weike wei, anu weaku wake na iwoka meya wei. Eno weike uyarike i sebo enaro anike nauibaie wai uraada kawama kokoroko weibi.

**69-70** Kokoroko weibiro i arumama nono erike i ku siane ibisa oroubake eno wei, yewa miye Yesunu waiya demui miya weibaie Fidama na meya wei. Nono dubuenaro i ku uke ibisa orouma Fidabake nono weisa, ae i orou duwero (12) emenu naiyeya weisa. Ae Gareri mideie iwoka sinaisia weisa. Anu wake i Gareri orounu wake ari weakuro naukaisia weisa.

**71** Eno weisaro Fidama merama wake weada wei, Yeka mi na iwoka meya wei. Eno weike wei, Na meo me ba weakunea weike wei, na meo wemauie Godima na fanisi mafaraku wei.

**72** Dawa eno weibiro kawama kokoroko nono yama weiro Fidama Yesunu wei wake imui. Yesuma Fidabake adinasa eno wei, kawama kokoroko wefekuie ako Nanu ibi buuba we ma fe yafakuro kokoroko nono wefekua wei. I wei wake Fidama imukada aweawero anike imuka inimu ukaada ii daiwera wei.

## 15

### *Yesu faeradinu ibooro enare ibi wake*

**1** Wai uriro dai ofereni ode sibore sianeka orouini dai orouini nono i Mosesinu darawadu

we ma iwoka ukeibisa orouini kanisoro orouini emua yaisina wake we makakake Yesunu wana mune ane derena enaro naama uwakake Dawa Romani gaemani dai yawokeka mi Faeradibairo waure ane maisa.

<sup>2</sup> Ane maisaro Faeradima Yesubake eno wei, A Du orounu dai yawokeka kini mi weibaie Yesuma euwa wei.

<sup>3-4</sup> Eno weiro dai ofereni ode sibore sianeka orouma wayai wake keuwere weibisaro Faeradima Yesubake eno wei, emenu wayai wake daiwerero anemebake wake we dakaku wei?

<sup>5</sup> Faeradima eno weiro Yesuma moko wake we dauiba ibake Faeradi imuka foria ui.

### *Yesu feafekua weisa wake*

<sup>6</sup> Godima i Isaraera orou Idifiroma waure aneka banau uruna i ewekaro i orouma ana ebaro ibeibi mi una demuibake weibisaro i dai yawokeka mima dawa ma woromeibaku.

<sup>7</sup> I odoro Barabasini moi eme ma feareka urane rarane ukeka orouini emua ana ebaro ibisa.

<sup>8</sup> I ku uke ibisa orouma Faeradibairo fakake eno weisa, anu bisara ari eno ua weisa.

<sup>9</sup> Eno weisaro Faeradima emuabake ma ow-erike eno wei, ya Du orounu Kiniya weaisa mi dawa naa ma woromimau eno wei?

<sup>10</sup> Eno weike nono dawa iwoka i orouma Yesubake ararua uyarada Dawa ukake waure aakabai iwoka sini.

<sup>11</sup> Iwoka sinike weiro i dai ofereni ode sibore sianeka orouma i ku uke ibisa oroubairo enaada eno weisa, Barabasi naa ma woromia weawe weisaro i ku uke ibisa orouma naukada dino daiwera uisa.

<sup>12</sup> Eno mane we enereibisaro Faeradi nono wei,  
Du orounu Kiniya weaisa mi aneme umau wei?  
Eno weibaie korosiro ikokoma ure odia weisa.

<sup>13</sup> Eno weisaro Faeradima nono wei, Danu  
meramade aneme merama ukinu wei?

<sup>14</sup> Eno weibaie korosiro ikokoma ure odia dai-  
were weibisaba ibake emenu ararae Yesu feafine  
ukaada weibisa ibake Barabasi ma woromike  
weiro Yesu usima uka.

<sup>15</sup> Ukaro Faeradima Yesu korosiro ure odifisane  
emenu wanaro mame odirie.

*Meremere orouma Yesubake ririau ukeibisa  
wake*

<sup>16</sup> Meremere orouma Yesu waukake  
aweaweroma i Romani gaemani dai yawokeka  
minu uwara udiro waure anisake emenu  
naiyemuku u weisaro faka.

<sup>17-18</sup> Fakaro i dai yawokeka orounu kokoiwerero  
yafa wauma Yesu baruke oisake mebuma  
sini ari eno naadidima mukake Kini orounu  
mogoiso ari ubu uisake Yesunu iiriro ure afua  
umane oisake Yesubake eno weisa, A Du orounu  
dai yawokeka kini bauwakanakua eno weibisa.

<sup>19</sup> Eno weada usima iiriro uraada wisiomu  
ukaada Yesunu ibooro ifoma kodudu yanakada  
Yesu we irukeibisa.

<sup>20</sup> Eno ukeebe oisake i kokoi wau ma kukune  
mukake Danu ba barukeka i dei wau ma baruke  
oisa. Eno uisake korosiro ure odifisane waure  
anisa.

*Yesu korosiro ikokoma ure dabame oisa wake*

<sup>21-22</sup> Aneibisaro Sairina orofa mi Saimoni  
dawae Arekisanaini Rufasini emenu babae.  
Dawae waiyaroma aare fariro eno weisa, Yesunu  
korosi waua weisake Gorogoda orofaro anisa.

**23-24** I Gorogoda weaisa wakenu ubiye bokai kaibai mane orofa. Iro aare fakake moi mima iraa bobo waini adua Yesu ifine mai. Mairo mediro korosiro ikokoma ure oisake Danu wau ainama mufeku ari weisake kasi dodoo uisake wau sia imusu imusu muka.

**25** Eweka amuke aare okoro enariro Yesu korosiro ikokoma ure dabame oisa.

**26-27** Korosiro ikokoma ure dabame oisake owaowa uisake Yesunu korosiro ma dabame oisa i owaowanu ubiye i Du orounu dai yawokeka Kini mi. I owaowa korosiro ikokoma ure dabame oisake moi waira ukeka miyai una raarayai moi mi moi enaro korosiro ikokoma ure dabame oisake nono moi mi moi enaro korosiro ikokoma ure dabame oisa.

**28** (Godinu bukaroma wake eno weakuba ibake enaenari uisa. Yesu Dawaini i merama ukaisa orouini emuae demuiya wefeisaya eno weakuba ibake enaenari uke oisa.)

**29** I fare aneibisa orouma we irukeka wake weisake bokai gidogado ukaada yo weisake weisa, Ama dai sosi ma doroo yafake odo buuba me sifiro nono ma enafane weideie weisa.

**30** Eno weisake nono weisa, Anu mane Anu bunama ma wiroa weisa.

**31** Eno weisaro i ofereni ode sibore sianeka orouini nono i Mosesinu darawadu we ma iwoka ukeibisa orouini emuama Yesu we irukada eno weisa, imusu orou ma wirokeibakukema nono eweira Danu onami anemebake ma wiroke dauke ibinu weisa.

**32** Eno weisake nono weisa, i Isaraera orounu kini korosiroma isafiro efeke imufe weisa. Eno weisaro i korosiro ibaada i waira ukeka miyai emuaini me sara merama wake weada we irukeibisi.

*Yesunu feareka odobake wei wake*

<sup>33</sup> Eweka okoro enariro i goi goi yaisina eweka edoro uke dauike dumu sine ibiro eweka arisi yare ane abanaro fariie eweka nono edoro ui.

<sup>34</sup> Eweka okoroma ane isafine abanaro siniro Yesuma daiwere wei, Irai, Irai, Rama Sabadani, i wei wakenu ubiye Nanu Godi, Nanu Godi, anemebake Na medinara weadama wei.

<sup>35</sup> Eno weiro moi enare ibisa orouma naukake eno weisa, nauawe Dawae Iraida u weakua weisa.

<sup>36</sup> Eno weisaro moi mima anike nifu ari erabunaku munike usiro uwanike kimurima imusu ari ana kai idudabai kouro sianike iro ma niuike Yesunu wake ebaro odike eno wei, Iraida ido fafike mufiro efe wei.

<sup>37-38</sup> Eno weiro Yesuma daiwere weike ido feari. Yesu feariro dai sosi uwara ubarenaro ooru raarayai enare kuure oisa dai burudu wau ido ekua barunaroma gagane isare aare ubiro fari.

<sup>39</sup> I dai meremere mima Yesunu feareka odo fu siniro erike eno wei, yewa mi Dawae Godinu Amara ubiya wei.

<sup>40</sup> Awekabo keuwere emua ekararo bi mame ibaada iroma Yesu ereibisa. Meri Megidarinaini nono moi Meri dawae Diosefuini Deimisi dawa dubuena mi emenu amaeini Saroumuini emuama Yesu ereibisa.

<sup>41</sup> Yesu Gareriro ibi i furo i awekabo emuama Danu umuro eneiareibisa. Iro enaada Yesu yawokebisaro i awekaboini nono moi awekaboini Dawaini Derusaremu goiro owere aare faka.

*Yesu ooru uisa odobake wei wake*

<sup>42</sup> I sabadi uke bou ukeka odo fariro dumudumu sinibake Arimadia goi mi Diosefu dawa

kanisoro mi dawa Godinu yawokaku odo yawokeibi. Dawama Faeradibairo anike Yesunu ofe mufine eenu wei.

<sup>43</sup> Weiro Faeradima Yesu fearinuba me ari we imuike danu meremere mibake u weike we nauke eri.

<sup>44</sup> We nauke eribaie fearinua wei. Eno weiro Faeradima Yesunu ofe bou mufine Diosefu we odairo ani.

<sup>45</sup> Anike awoena inanawere wau oima make munike owere anike Yesunu ofe korosiro ma munike wauma oba uike waure ani.

<sup>46</sup> Ane eme odeibisa oma eraboro odiro dai oma ferawere ma ubere ubere uke anike oma eba dadau uke odi.

<sup>47</sup> Eno ukeibiro Meri Megidarinaini Diosefunu amae Merini emuama ereebe Yesu ooru uke oisa orofa eki.

## 16

### *Feareroma nono uyarekabake wei wake*

<sup>1-2</sup> I sabadi odo me siniro Meri Megidarinaini Deimisinu amae Merini Saroumuini i awek-aboma Yesunu ofero kare odeka irauaiai fauda oima make mune anisake aisa. Aisake wai awanakuro uyakake anaada bora eweka sianiro eme me sineibisaro odeibisa orofa eka.

<sup>3</sup> Aneebe eno weisa, i dai oma aisamero ainama mune siafeku weisa?

<sup>4-5</sup> Eweka fariro eme odeibisa oma erabo fare ekabaie i aisame dadau uke oisa oma ma ubere ubere uke ane odi ibake i ebaro isaka. Isakake ekabaie inanakeo wau yuni adara mi baena wana enaro yaure ibibake foria daiwere uisa.

<sup>6</sup> Eno uke foria uisaro i yaure ibi mima eno wei, ia da siawe weike nono wei, i Nasaredi Mi

Yesu Dawa korosiro feari Mi efone farisa weike eno wei, Dawa ewado ibe meya weike nono wei, Dawa uyarinua wei. Dawa oisa orofa yewadoya eawe wei.

<sup>7</sup> Aniawake Danu iwoka ukeka orouini Fidaini emuabake eno weawe wei, Yesu Dawako Gareriro anifekuro ane efoisaya wei. Yesuma wei enaenari anifekuro efoisaya wei.

<sup>8</sup> I mima eno weiro eku duboro amuisake ia sikake iura mamaada moi oroubairo we da uisake durame anisa.

*Yesu Meri Megidarabairo Danu iboo ma iwoka ui wake*

<sup>9</sup> Fura bokai odo wai awanakuro Yesu fearekaroma uyarike Meri Megidarabairo Danu iboo ma iwoka ui. I aweka dawa adinaro Yesuma seidaniu merama imumu yaisina seweni (7) dawabairo we berai, i awekabairo dawako danu ibooro fariro erike ani.

<sup>10-11</sup> Yesu Danu iwoka ukeka orou sorara ukeibisaro ane farike eno wei, Yesu fearike nono uyarinuke ibinua wei. Eno weiro, Yesu Danu iwoka ukeka orouma i awekabake ma owekake eno weisa, dawa meo weakua weisake danu wake nauke dauisa.

*Yesuma Danu iwoka ukeka orou danu iboo ma iwoka urie wake*

<sup>12-13</sup> Nono dubuenaro Yesu Danu umuro eneiareibisi miyai daabaro aneibisiro Yesu ofe imusu sinike emuabairo fariro ekike ane Danu umuro eneiareibisa oroubake Yesu erisua weisiro emenu wake nauke dauisa.

<sup>14</sup> Nono dubuenaro Yesu Danu iwoka ukeka orou yaisina ireweni (11) uruna isaada yaure ibisaro Yesu emuabairo ane fari. Ane farike Danu

imusu we forairo emenu imuke dakekaini imuka  
ara ukekaini i Yesu eka orounu wake nauke  
dauisaba ibake Yesuma dino wake wei.

<sup>15</sup> Dino wake weike nono wei, doo baruna ure  
barunaro yaisina aneibiaweweke i orou yaisinabake  
Godinu irau wake weibiawe wei.

<sup>16</sup> Godinu irau wake weibiawero ainama God-  
inu wake naufekuke babadaido ufekuie ma wi-  
rofeku wei. Eno weike nono wei, ainama Godinu  
irau wake da naufekue merama orofaro ani-  
fekua wei.

<sup>17-18</sup> Eno weike wei, irau imukaisa orou  
eno ufeisaya wei. Eno weike nono wei, i  
irau imukaisa orou Nanu ibiro seidanimu  
merama imumu we berafeisake wake imusu  
wefeiwase waa waru mufeisake buya ifeiwarama  
da feafeisake arama ukeka orou Nanu ibiro  
weada emenu iiri duboro wanama odifeisaro  
wirofeisaya eno wei.

### *Godima Yesu urero waure amuke ani wake*

<sup>19</sup> Godima Yesu urero waure amuke aniro Danu  
ba ena wana enaro yauri.

<sup>20</sup> I Yesu Danu iwoka ukeka orouma Godinu  
wake aboro aboro we enereifisane anisa. Anis-  
aro Godima emua unu koreibirieba ibake buna  
wake weibisake buna ukeka daiwera ukeibisaro  
i ereibisa orouma we imukeibisa, Godima emua  
unu korakunea eno we imukeibisa.

**GODINU IRAU WAKE  
The New Testament in the Aneme Wake Language of  
Papua New Guinea  
Nupela Testamen long tokples Aneme Wake long  
Niugini**

copyright © 1988 Wycliffe Bible Translators, Inc.

Language: Aneme Wake

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

---

PDF generated using Haiola and XeLaTeX on 18 Apr 2025 from source files  
dated 31 Aug 2023

701af0fe-16f9-57c7-9d24-5986c1a53403